


元許文忠公至正集

柳田文庫  
文庫11  
D 93  
10



文庫 11  
D 93  
10

273

10

010190548940

公移一

言監察御史李謙亨等量移

雷霆震怒終不廢於生成雨露沾濡初何分於美惡况沛九天之厚澤固宜一視而同仁凡仕清朝舉承殊渥豈容餘潤獨限遐邇欽惟今上皇帝以上聖之資舉曠世之典被服袞冕躬祭太廟制作鹵簿聳動神人大禮告成有生胥慶推恩臣下同有崇卑內外四品以下職官普減一資至於至治二年前入役者考滿入流日皆與優減天休所被踴躍難勝若有在官得罪而情或可矜者亦宜量加滌濯祭統所謂明惠之必均也比者監察御史李謙亨成珪以言事得罪欽蒙宸斷寬之里干地面獲全首領幸已莫量但各人適際昌期舉行盛事倘均沾溉益見恢洪若蒙發還



原籍唯復量移近裏薄示從寬不惟使之得以自新抑見天地父母之德宏大難名遠邇無間也

風憲十事

照得延祐三年六月欽奉 聖旨作新風憲一款監察御史廉訪司官凡利害可以興除軍民休戚切於時政者各宜盡心敷陳以憑采擇又至治改元詔書天下之大機務維繁博采輿言庶能周悉自今內外七品以上官有偉畫長策可以濟世安民者實封呈省伏念卑職一介寒微屢叨甄錄凡偉畫長策之可采豈淺才未學之所知既博采於輿言且下詢於百職况叨言責敢竭愚誠嘗謂天下之事非一設官分職各有攸司而官職之中風憲尤重所以糾百官之非違示百官之軌範故其用人也必當極天下之選而於行事也必當盡天下之公奉法持衡毫髮無間然後可以

責人未有己所不能而責人之不至者邇來風憲之事或已有成法而不能奉行或雖有舊規而事當損益庭荒田治蓋所未聞故不敢他及而以風憲十事具陳如左

取補書吏

書吏名役至輕所係至重補用之法屢有變更所以不憚煩者必欲得人而後已也然而政法愈密得人愈難事墮法墮其弊益甚至使外而郡邑內而朝廷語及此徒無不聳感豈天下果無其人而立法終於不善耶蓋亦究其所以然者夫天下之人才本難而憲司之事權實重事重則庸人力不勝任權重則小人挾以營私紀綱之廢職此居多苟能依例令管民文資正官從公保舉廉訪司官覆察相同面試中程然後補用如有不應元舉覆察考試正官首領官黜退該吏斷罪勒停則亦何患無其人哉今則所舉大

率非有力者不得覆察者符以虛文甚無謂者面試之日皆與符同公堂秉筆落紙成文者蓋百無一二也考試之官初亦豈有私意不過謂人身事辛苦至此忍使流離奔走不遂而歸意則佳矣奈國事何後來者又復如此久久相因是使憲司不終於得人也使其對面依例必試雖元舉覆察已完而其不實者則皆不逐而自退矣豈不革一切之弊哉至於敗缺往往有之而所謂黜斷者絕未聞也人亦何憚而不因循故常哉補用之法以此為綱始終相維但必行之人自得矣若夫節目之損益亦有不吝不及者歲貢儒人雖有明敏之資而遽為未試之事殆未易也今後須要年三十以上覆察完備先歷路吏一考三臺典吏雖案牘素所習學而資質不同工拙遂異其應充書吏者亦合先歷路吏一考然後試補官既獲用彼遂達材亦將樂於趨事也奏差名役雖又稍輕

今皆轉補書吏始由州吏取充較之路吏所歷既淺所進亦優合於歲貢不盡路吏內舉察取用依例試補書吏若是則曰綱曰目交相維持申明舊網參酌新目補用之初責以必試若有敗缺將元舉官吏必罰無恕人各有警而人才自得矣

### 會議還司

照得作新風憲詔書各道分司若不徧歷百姓利害官吏貪廉豈能周知除廉訪司使守刷按置司去處餘擬每年八月中分巡至次年四月中還司如不依期出巡及巡歷未徧托故回還或依期還司不曾徧歷及應結絕之事而不結絕者聽總司申臺區處竊惟外郡遠邑小民茹苦含悲而不能赴愬汚吏竊時肆暴而恬淡自安者憲司之官非身踐其地心誠求之蓋未易周知也朝廷立法謂舊制月日拘迫不能徧歷改擬八月中分巡四月中還司所

以責其郡邑必徧而事務必辦也今則每至分司之時總司依時分道發印而各官因循宿留非半月兩旬不能出戶總司未免催促遂至構怨生隙妨害公事至於文移之往來自有遞鋪必曰重事亦有額設奏差乘驛往來或者又有必須議論面相可否之事須要經手諳知首尾之人則書吏固其人也今則每遇會議公事司官必領吏屬躬自還司驛馬祇應之勞費郡邑官長之送迎歲月因循事務廢弛一行之間所失若是之多也又每遇詔赦不問條款拘該如何指稱未奉通一例回還直候申稟明降方行出司雖有明白赦前應追會者亦漫不省視至於體覆體察之事與赦文了無相干一切付之不理此尤不可不論者且以已往通例考之即可見也今次遇赦不過照出先奉例文稱說合無比依前例一體施行省部擬議大率皆准舊格至於再四重重相因豈有

假此為名遂謂無事設若一二新事舊例所不該者候奉明降至日施行與其餘蓋無相妨也推其所由一則妻子在家急於看視二則辭難避事既廢歲月因循苟且培養資品而已百姓之利病官員之貪廉蓋漠如也夫外郡遠邑望司分之來若飢渴之待飲食一事未畢飄然而歸其失望為何如哉况有已經論告之人未曾究問者挾恨報讎適足以重吾民之害耳彼得以為辭者止謂無事而虛費祇應使其果無一事但監臨州郡所以消貪邪護疲瘵者不能盡言祇應之費其有幾何況會赦而可行者不可勝計除出司不依期及不曾徧歷已有明文外今後凡會議公事重者止許差書吏還司其分司官理宜禁止若遇詔赦亦合止於所分州縣聽候通例按行其餘合辦公事至四月中依例迴還庶免曠弛

文案稽遲

風紀之設振肅綱維宣明風化鎮遏奸邪為重至於刷磨案牘特簿書期會之末然而刑獄之重輕金穀之出納舞弄於巧密之內包括乎繁冗之中故照刷之時尤宜介意且諸司文案憲司得以治之遲者督之使行錯者釐之使正隨其輕重而施其決罰雖一檢一劄之失行十日半月之稽緩蓋必較而不恕也至於憲司之事錯者遲者何限首領官雖有檢舉之名分司迴還亦有照刷之說而常人之情無所警畏習於故常狎於情好終於付之不問而已苟以照刷有司之法待之將何所措手足耶有總司立案候分司出巡施行之事分司迴日或以還司日近或以巡歷不曾到彼或轉行委官卻行卷連回牒總司明年出司又復如此搬卷往來有至二三年者本司如此而欲責有司之遲慢可勝歎哉夫書吏

權重上下之所共患而莫究其所以然者請因是論之夫分司之出也官吏三四人而已為之官者使皆熟於案牘精於事情則為之吏者雖欲高下其手舞智作奸其可得乎其有高坐堂上大小事務一切付之於吏可否施行漫不省錄事權之重雖欲不歸之於吏不可得也為吏者雖欲避之亦不可得也况有所見之不同書吏所執雖是而不能抗官長之勢其不說隨者鮮矣切照按察司設立書吏當時議論事事周悉但用非其人不能無弊遂以為冗員革去今欲去事務之稽遲削書吏之權重莫若每道依舊設立書吏四名巡行之時分道而出贊畫公論扶持紀綱還司專一分翰檢舉照刷文案其三臺察院亦合各設一員並於各道並行臺察院考滿書吏應任提控案牘及儒貢書吏兩考之上者選充一考之後依例入流如此則案牘免稽遲之患而書吏之權不削

自輕矣

薦舉官員

為治之要在乎得人取人之道必當極天下之公論而後能盡天下之人才薦舉之法固取人之急務然舉之苟不以道恐復有遺才之恨今日之事試以四事論之舉之未盡善者有三而導之使競者則有一焉所謂未盡善者一曰五事舉人之弊五事之目因循雖古實則虛文戶口之增不過析居放良投戶還俗或流移至此彼減此增之數夫何能哉江南之田水中圍種齊魯之地治盡肥饒雖有真才五終不備遼海之沙漠莽蒼巴蜀之山林溪洞龔黃繼踵能使田野闢乎欲盜賊之息者有盜匿而不申求辭訟之簡者將應理之事亦付不問至於賦役則上下貧富品搭科派自有定規盡能奉行亦分內事况實效茫然凋瘵日甚惟其必以五

事全備取之則誰不巧飾紙上且例文明謂所舉但有敗闕罪及原舉察官今敗闕者何限而黜責未聞宜其翫習苟且非息不舉也今後莫若令監察御史廉訪司官凡路府州縣官各舉所知不必拘以五事明言其才能事政著明實蹟以備采擇嚴其同坐之科必罰無恕則人才將自得也二曰不明所長之弊夫人才古今所難人各有能有不能不可強其所短而廢其所長也近年以來每見所舉之文一概無非可居風憲言路之人若夫治民用兵理財聽訟主文參幕考工明術者世豈無之見於薦剡者蓋百無一二也今後擬合各言所長至省部籍類以憑采擇庶銓用之際各適其材三曰連名同舉之弊監察御史舉人之際多挽同列連署滿紙同署之人復有論薦亦復要之雖有素不相知之人未免委曲順從殆如答禮蓋以平日往復之有素也夫人之相知各有淺



深必欲同銜實非公論今後擬合令單名薦舉果有同識其賢亦合別具薦狀庶革牽聯之弊其一事導之使競者比見薦到五事備廉能官員憲臺既已除擢後又與之呈省遂營求升等減資且始言薦之以其可居風紀激厲貪濁俾居清要則是已賞之矣又圖升減不惟有礙選法實導之使競也今後擬合將已經臺除者再不升減其已省部升減之人憲臺若欲除用須待再舉無瑕然後甄錄庶少抑奔競之風

### 廉使頻除

分職之在外者莫重於憲司用得其人則一道之聞功效有不可勝言者况廉訪使職長一道權總副僉分司總司皆聽處決是以其職尤難其人苟得其人可不假以歲月使之盡展其長乎今天下二十二道闕者蓋十常六七徧歷精選僅得幾人而到任未幾尋

復改授夫天下之事非責之專任之久未易有成也朝廷定制內任以三十月外任以三周歲為滿雖有明敏過人之才至於本末之後先輕重之緩急布置施為各有條序固非急遽之所能盡也語曰苟有用我者期月而已可也三年有成夫子大聖周歲之月但僅能布紀綱至於治功必三年而後成子產相鄭一年而謗之三年而頌之今之所用果何人哉苟得其人則又或一年或半年或數月紛紜改易席不暇暖家貲盡於遷移筋力疲於道路公務益墮紀綱不振職此故也夫省臺所職雖有不同幾務重輕亦未易別大抵事體相需同欲致治而已今憲臺選用官員所至之處吏屬尚未盡識而省部論擇復與改除其有用者臺亦如之遂使一人之身一歲數遷一或不除皆置不用人才固難而用之如此將何以責其成效耶今後廉使既得其人部省不請改用須待將

滿卻聽選除庶三年之間一道之事得以盡其所施也

遠道闕官

天下之大生民之衆撫之以郡邑網之以憲司可謂治具畢張矣而遠邇之間有不容不辨者各道司官除廉使守司刷按置司去處其副使僉事分道出巡所至詞訟填塞公務紛紜推問不公審斷獄刑照刷文卷點視倉庫及體履體察一切公事一有缺員則巡歷未至之地必有受其弊者今所至闕官或令副使僉事守司而按治州郡皆不暇及况腹裏邊遠事勢不同腹裏時有闕官郡邑官吏猶或有所忌憚設有縱恣不法而禮法之民有苦而已若夫邊遠地面山川溪洞之險阻徭黎夷獠之冥頑撫字或乖利害不淺官吏憑恃險遠率多貪污漁獵繭絲無所不至非特憲之人監臨彈治使之有所警畏殆未易靖也今年廣西一道至今闕官

令經歷權攝司事廣東海南福建率皆闕人蓋是已除者托故不來而到任者不久即去迹其所由亦各有說人情孰不欲身之安佚以遂其仰事俯畜之心哉今則不擇其地之遠近人之便否一概授之雖巖其不赴之罪亦無以作其必往之心也江南三省接連及廣海地面二品至七品官員可任風憲者豈無其人若將各道分相近地面官員有政績昭著曾經薦舉者遴選銓除庶人皆知勸可謂無闕官之患

冗食妨政

憲司設官置吏雖大小不同而人各有職豈有無事安坐贅員冗食不能少裨治理又復有蠹於政事者哉且司官首領官責任之重固不待言譯史則標譯文字譯表章書吏則按行照刷審理推問奏差則往來傳達實為行人以至典吏之微亦各有事而通事

之設本為蒙古色目官員語言不通俾之傳達固亦切用之人然  
而今日各道監司大率多通漢人語言其不通者雖時有之而二  
十二道之中蓋可屈指而知也則是所用之時常少而無用之時  
多虛糜廩祿又與出身日無所事不過挾司官之勢凌侮吏曹俯  
視官府擅立威權恐喝有司屬托公事附帶買賣影蔽富民誠以  
安坐而食無所用心故其為己營私既專且精也舉世皆知書吏  
握事權重之弊而不知此曹雖不握事而事實由之故其為害若  
輕而實重弊難盡除去其太甚今後莫若令譯史兼之各路亦合  
一體照磨雖曰職官皆重廉恥架閣承發付以典吏紙劄抵候遂  
為專司餘則無所事而坐食亦合減去令知事兼之今各道  
照磨闕處不少未聞兼之而有失懼者也或謂寺監三品清閑衙  
門皆設照磨通事此可減乎曰風紀之司一事之微皆當極天下

之公論天下冗員不知其幾風紀之司皆當建白整頓縱不能此  
忍自畜之或者又謂欲此闕安置人員尤非公論孰謂風紀之司  
而有為此論者乎倘蒙詳察議行亦有補於風憲

### 銓除御史

監察御史前代八品之職國朝官制為正七品選格內任一考與  
升從六外任兩考方進一等握等計資毫髮不貸至於憲臺除月  
歷御史者即除各道僉事正五品職內轉臺為都事必授副使正  
四品級非戾於選法也誠以御史非百職事之可比庶務之利病  
皆得而敷陳百官之奸邪皆得而糾劾朝廷使之位卑而言高者  
蓋御之有道也人之常情望其所未至則必奮發激勵勇於趨事  
刀鋸在前有所不顧位卑祿輕則易於棄去無患失之心去就既  
輕作事必勇若厭其所望滿其所欲則必委曲周旋保全遮護今

也四品五品率皆除之甚有資歷已及三品而浮沈其中彼果何望而奮於立事耶故事之來也含糊模稜目曰老成鈐口縮頭號為持重迨晚景者顧影而自惜計子孫者留意於將來因仍改除遂為得計今後莫若先儘縣達魯赤縣令令有治迹治次及內外六品七品才德堪充之人其資品高者不必銓用庶無患失之心又近年以來每將怯薛人員除充是職夫聰明敏達者固亦不少而事務生疎者不能無焉亦合精選上等知識而明敏剛直能勝其任者為之庶幾適用於憲網不為小補

### 贓罰賑濟

近承奉臺劄准西河南廉訪司將贓罰錢賑濟飢民奏准今後若有賑濟沒俺文字休交動支竊謂民以食為天遇時有阻飢之患國以民為本救荒實為政之先 聖朝子育黎元鰥寡孤獨給糧

養贍災傷水旱蠲稅賑恤德音諄諄不一而足又今所在存留義糧以待凶歲勤恤至矣然而州縣非才奉行不至不幸有水旱之不時細民實獲其惠者未之見也而况經費不貲帑藏有數噉噉仰給卒無以應之遂至鬻子買妻輕則為道路之流民重則為原野之餓殍救之之道當如拯水火中之焚溺也夫廉訪司所收贓罰錢物始則實出於民皆濫污官吏掊克聚斂之物與其他用不若歸之且各處人民必見已飢而後陳報未有逆料將來而敢預為申請者也若待明文恐有不及如蒙詳酌若有賑濟附近道分擬候明降其餘遠道有司錢穀果有不敷許令支用庶望飢民不致失所

### 農桑文冊

農桑生民之所天有國之大計人無智愚皆知其為重且急也

世祖皇帝內立大司農司總挈天下農政各處正官歲時勸課無成效者御史臺按察司糾察究治又立行司農司勸農司分地管領為是農桑已見次第併入按察司添設僉事二員後欲減省臺官一同奏准廉訪司事多依舊存設在後節次奏准管民官提調廉訪司體察未聞廢弛延祐元年四月大司農司奏奉聖旨節該廉訪司為農桑兩遍添官交依舊管行每歲攢造文冊赴大司農司考較夫責之廉司者蓋以勸課官知所警畏初不係文冊之有無文冊之設本欲歲見種植墾闢義糧學校之數考較增損勤惰所以見廉訪司親為之然養民以不擾為先而害政惟虛文為甚農桑所以養民也今反擾之文冊所以責實也今實廢之各道比及年終令按治地面依式攢造路府行之州縣州縣行之社長鄉胥社長鄉胥家至戶到取勘數目幸而及額則責其答報之需一

或不完則持其有罪恣其所求雞豚盡於供餉生計廢於奔走人力紙札一切費用首會箕斂因以為市卑職向叨山北憲幕蓋親見之而事發者亦皆有按可考以一縣觀之自造冊以來地凡若干連年栽植有增無減較其成數雖屋垣池井盡為其地猶不能容故世有紙上栽桑之語大司農歲總虛文照磨一畢入架而已於農事果何有哉况分司所至去處公事填委怨怒未畢已迨程期豈能一一點視盤量兼中原承平日久地窄人稠與江南無異若蒙詳酌聞奏依舊巡行勸課舉察勤惰籍冊虛文不必攢造民既無擾事亦兩成

公移二

封贈

照得延祐七年改元詔書封贈之制本以激勸臣下比因泛請者衆遂致中輟今命中書省從新設法議擬舉行毋致冗濫竊謂勸善懲惡有國之大經宣力輸忠人臣之常事然必勸之有道懲之有法而後可以使之身無遺力心無遺忠苟為不然雖刑罰日嚴終無以格其為惡而進其為善也朝廷舉行封贈使為臣者一身之貴上及祖父母父母下逮妻子天下臣僚孰不感激奮發思報萬一勸之之道可謂盡矣至於但犯取受之贓並行追奪雖有至愚無知見其父母已受之恩一旦奪去苟有人心豈不慚痛懲之法不亦至乎則是勸善懲惡之道未有逾於是者也朝廷此制

初行在京官員七品以上就任申請悉被恩榮普沾存沒至於陞陞亟請再贈再封者有之而外任職官例皆任滿給由方得申請適遭中輟不及沾被欽承詔旨再許推恩中外臣鄰莫不欣戴延望逾歲未蒙舉行或親至衰耄慮不及於生榮或身迫暮年恐莫酬於孝志希望之情固不能已如蒙仰遵明詔俯憫下情早賜頒行不惟臣下溥被天恩抑且勵忠勸孝其於政化實非小補

丁憂

至大四年三月欽奉詔書官吏丁憂已嘗著令今後並許終制以厚風俗朝廷奪情起復蒙古色目管軍官員不拘此例竊惟治道必以教化為大經人道必以孝忠為大本教化不施雖有刑政不能為善治孝忠無取雖具形體不足為全人而況忠出於孝則是孝又百行之大者焉欽惟聖朝以孝理天下稽考典禮除蒙古

色目各從本俗其餘居官者為丁憂之制將以美教化厚人倫為治之要道也所謂奪情起復者蓋有道德行藝可以範世謀猷材畫可以經邦天心簡眷人望素服或邊臣宿將久諳軍政智謀韜畧可任邊寄似此必用之人謂之起復誰曰不然其或碌碌凡庸如馮翼霄才無過於常人行每乖於清議徒以諂佞儉邪亦復冒膺起復實玷風教宜明白奏聞除上位知識必用之人取自聖裁其餘人員並遵舊制其於治道不為小補

吏員

欽奉聖旨節該漢兒吏道從七品以上休委付者教授秀才並職官內取的令史依舊例委付者又憲臺奏准監察御史廉訪司依保守令例每歲各舉諳練刑名者一人注充推官竊謂一統萬邦治雖多術大經要道首在得人論材有長短之不齊立法貴變通

而無弊故求賢擇善必自多門而趨事赴功庶臻成效欽惟我朝  
建元以來百度修舉惟科舉條目議而未行出官之制大率由吏  
而貢吏之法必以儒通吏事吏通經書然後補用在後奉行不至  
試補之間多不依法遂使賢愚混淆政事敗闕 仁宗皇帝勵  
精圖治痛懲其弊而一新之由吏出身者限以從七不使秩高權  
重得以縱恣設立科舉取人以德行爲首試藝以經術爲先求賢  
之方視古無愧但科舉未行之時以吏取人實學之士亦未免由  
此而進一概限之不無同滯且名器之設所以陶鑄人才鼓舞爲  
善者也各衙門通事知印宣使奏差之類勞佚懸絕而出職反高  
又得陞轉獨於吏員待之既殊過之又甚自非特立堅守之人亦  
何勸而爲善耶目今中縣以上銓衡有乏材之歎郡邑多闕官之  
所又欽奉聖旨歲舉推官一人推官從六品職必精曉刑名洞達  
事理慈祥愷弟歷練老成之人方可任此不廣其途亦難選舉夫  
吏弊蠹政固爲不少但科舉未行之前儒皆爲吏其貪虐鄙俚之  
徒限之固宜而廉慎儒雅之才恐遂併棄合無自頒行科舉詔書  
日爲始以前該降吏員量許陞至三品以後入役者從五品止庶  
賢愚無同滯之患官府有得人之效

糾副使哈只等

士居下位尤殫心力於公忠權貳一司已極班行之清要苟守己  
或乖於彝憲則原情尤重於常刑况郡邑毫釐之私莫不抵法而  
奸邪什百其害乃欲治人論劾不明勸懲何在近奏臺劄江西守  
省體履各道聲迹至海北廣東道體察得本司副使哈只蔡衍不  
公等事謹按哈只者心本貪邪才兼詭譎敗事何限贖貨無厭風  
聞肆威龍斷罔利有司之所罕見邑胥之所不爲先任海南道副



使延祐三年十一月到任隨時出司照刷石康鹽課提舉司文卷所欲既厭將分司印信分付隨行書吏於延祐四年二月稱病徑歸今除本道於至治元年二月到任至治二年七月二十日遽爾托病出廣其蔡行者腐儒散材凡庸小器素無令望屢玷清班至治元年十一月到任奉公守法之微效未見營私違禁之實跡已明於至治二年閏五月十一日亦行稱病出廣若候聲跡通行具報緣各官俱已離職誠恐憲臺不知或加選擇實玷公論伏乞顯示黜斥用肅憲綱

丁憂委差

分職用才貴無曠天工之寄丁憂著令蓋俯從孝子之心故雖重任之在身並許居家而終制至於取受被問之際經值親喪亦聽服闋方行歸問所以重百行之原明彝倫之大既彰孝治且將有以資其忠也近奉臺劄江西守省糾察非違等事至臨江路體知本路至治元年閏五月內承奉江西行省劄付發下太宥先生春秋計料刊板其儒學提舉司不照係已經國子監校正文字卻行移文令某人校勘其某人者先任太常奉禮郎在任值喪還家丁憂斬焉衰經之中披襟受委開設官署臨局督工瑣屑校讎往來造請忘不文之訓違讀禮之經當寢苦歎粥之時豈趨事赴工之日殊不思見任官員之事尚許辭謝既已離職居憂乃復應此無名差遣其於典禮乖莫甚焉宜令合干部分定擬今後凡丁憂官吏各衙門不得差委違者原委官司並受委之人各坐以罪庶少革澆薄之風或可助孝治之萬一

陳酉娘

臨江路新淦州人廖所瞻娶祖母之妹陳酉娘為妻有司以其成

婚二十七年生子復孫又是各姓中書省送禮部議終是各姓未  
有服制成婚年遠生子見孫難議離異今來謹按刑統戶婚律云  
父母之姑舅兩姨姊妹及外甥女女婿姊妹並不得為婚姻違者  
各杖一百並離之議曰父母姑舅兩姨姊妹於身無服乃是父母  
總麻據身之尊故不合娶及姨又是父母之大功尊若堂姨雖於  
父母無服亦是尊屬母之姑堂姑並是母之小功以上尊己之堂  
姨及再從姨堂外甥女亦謂姊妹所生者女婿姊妹於身雖並無  
服據禮不可為婚並為尊卑混亂人倫失序違此為婚者各杖一  
百雖會赦各離之竊謂治雖多術正俗是先教有常經明倫為急  
况夫婦係三綱之重故經典著有別之文愚民雖出於無知明法  
不可以稍貸苟行姑息恐愈澆漓其廖所瞻娶祖母之妹父之尊  
姨陳百娘為妻在律明禁於娶姨在經深惡於烝上其為尊卑混  
亂人倫失序也至矣朝堂每議為例事理率皆酌古準今稱停平  
允然後施行今若以為終是各姓未有服制則豈父母有服之尊  
而已以無服娶之為妻者擬合斷離以勵風俗况江南澆薄成風  
利其親戚之富多方承繼不問尊卑無以禁之則是不惟無救於  
既往之非又將大啟於將來之隙其於風化所係匪輕擬合明立  
禁條違者斷罪離異庶於世教有補

蒙山銀

竊謂生財有大道豈小智之所能餘利不在民非為國之先務况  
有利輕害重人所共知法弊事墮下不堪命者若不懇陳其責有  
在蒙山銀場提舉司歲辦課銀七百定辦納不前將提舉陳以忠  
斷罪體究得本處銀場在亡宋時官差鹽場十分抽二歸附後至  
元廿一年撥糧一萬二千五百石辦銀五百定後節次添撥糧至

四萬石至大元年撥屬徽政院每歲辦納不前往往於民間收買  
回爐銷煉解納蓋緣歸附以來近五十年本處地面都能幾何所  
用礦料必取於坑洞薪炭必取於山林銖兩而求尺寸而伐以有  
限之出應無窮之求其地產不已竭乎加以言利小人如陳以忠  
先為連年虧額自願每糧一石減鈔十兩折收輕費三十兩承認  
額辦因此致令徽政院易於准言濫受此職不數年間卻又陳言  
欲行添及元數公然欺罔雖曰不准而前後數年每糧一石巧立  
名色收至六十兩稍或不從則以輸納遲慢監鎖筆楚山野之民  
畏之如虎斬木伐屋與賣妻子者比比皆是本人所畫之計不過  
為身所行之法惟務害眾為是本處坑谷已空薪炭已竭人力凋  
弊已甚侵漁已極逃移者眾連年虧兌蹤跡顯露計無所施勉强  
支撐中實憂悔既任其責欲罷不能是以又將興國地面銀場協

濟煽辦移江西之害及湖廣之民及言宣州等處可以煽銀請於  
所屬改撥戶糧造此妄言苟延殘喘鄙夫患失無所不至聞之居  
民欲食其肉欽惟 聖朝富有四海視此微利何啻毫末奈何  
容一介小夫之奸欺為數郡細民之荼毒使其害及閭閻得利十  
倍邦本所係猶不可為而况所得不敷所費者哉先以行省所委  
體勘官瑞州總管史朝列等計料所費每銀一兩該鈔一定一十  
三兩虧官損民不便令銀一兩雖曰止該官本十四兩然因礦炭  
盡絕燒煉不前俱係爐戶用錢收買輸納已是添答鈔兩至於納  
官之時官吏庫子人等百色所需並帶納折毫諸般剝剝及官吏  
多答鈔數收受輕費轉行買納其弊百端由是較之則每銀一兩  
本官四十兩外爐戶又加一倍之費方能了辦民之所費皆其脂  
膏若謂此非官帑所出視如不費則父母之於赤子果有聞乎近

年以來坑洞日以深遠每入取礦則必篝火懸繩橫穿斜入竇穴  
暗小至行十餘里巖石之壓塞水泉之湧溺其為險惡蓋無可比  
加以山嵐毒氣旦夕侵攻枉死之人不可勝數興言及此誠可流  
涕耳目所及敢不力陳若以為國有常額難議除豁朝廷所用必  
不可無莫若革罷提舉司衙門將所撥糧四萬石折收銀七百定  
依江東諸郡金課例每年立限從有司徵收解納則是每糧一石  
折收銀八錢七分五釐每銀一兩該免糧一石一斗四升二合八  
勺官不失額民不被害回視剝其脂膏流無窮之害陷於坑谷殺  
無算之人而所得不償所費者其為利豈不百倍哉方今政令一  
新次第極治於斯之時若謂設立已久恢辦有常憚於更張因仍  
循習則蒙山民瘼日甚一日未有涯涘也窮苦之極其害且有出  
於經理田糧之外者卑職親究其事義不容默如蒙早為講究施

行疲民幸甚

薦吳炳陳繹曾

竊見處士汴梁吳炳業專聖學文造古人特立不渝真積力久忘  
情軒冕守道衡茆勢利不足以動其心貧窶不足以累其志又江  
南陳繹曾博學能文懷材抱藝挺身自拔乎流俗立志尚友乎古  
人放志山林浮雲富貴但各人既不自嚮恐後日或有遺賢如於  
文翰之職內不次徵用不惟揔其素蘊抑亦可以砥礪流俗

公移三

辯平章趙世延

伏以公論昭明見朝廷之政治正人伸雪乃風憲之振揚苟有見聞豈容緘默竊見光祿大夫前四川行省平章趙世延先任御史中丞倡率監察御史奏劾奸臣帖木迭兒不法一十餘事及中丞朵兒赤等按問帖木迭兒下總領蔡雲因馮開平身死公事過付張五十三許與帖木迭兒中統鈔一千定本人受要說事錢二百定招證明白徵贓到官其帖木迭兒幸得脫免追印罷職因此懷蓄忿怒至延祐七年復入中書盜弄威權專務報復陷害忠良無所不至將中丞朵兒赤并蕭拜住織羅誅殺又以溫迪罕嘗贊其事坐以減死之罪為平章趙世延遠任蜀省令人誘說伊房弟胥

益兒哈呼將赦前干名犯義虛妄事情排陷陳告差人勾喚赴都對問行至中途遇詔赦釋免又行差官催促到部令伊門下心腹人尚書荅里馬失里非法鍛煉勒要招服鎖發前去三不刺復還大都凌虐枉禁前後三年意逼自裁本官剛明自負不為匹夫自經溝瀆之事其元告人自知誣妄不敢面對因此在逃根勾不獲為本官患病奏奉聖旨保管在外刑部議擬胥益兒哈呼許告房兄趙平章逐項事理俱在革前元告人在逃百日之上依例革撥改正蒙中書省聞奏令還家養病茲者欽遇 聖天子登極之初眷念忠良枉罹利害如朵兒赤蕭拜住溫迪罕等首降德音特與昭雪其平章趙世延即與中丞朵兒赤等一體中外共知理宜辯正况本官廟堂偉器柱石良材省臺出入垂三十年劬瘁焦勞幸脫虎口似此老成蓋未易屈指也江南行臺已嘗辯明如蒙奏聞擢用允愜輿情

### 辯廉使劉藻

繩愆糾繆固為憲治之常美化移風尤係人倫之重故經典著子為父隱之訓而法律有許相容隱之文誠以教化乃刑政之原而名義又教化之本使其干名犯義許證皆實其於治體所傷已多况有是非未分曲直不辯泡沒齒之究者乎 聖朝明詔天下著為定例承宣奉行其可忽耶伏見前淮東道廉訪使劉藻皇慶元年因揚州路包辦酒課不便本官力言議減瓶花價錢遂忤眾意本道蠻子監司受訖酒戶趙勝中統鈔三百定經宿卻行賈至公廳喚到與錢人趙勝等取問指出上下官府錢一千五百五十定內劉廉使下家口周來安鈔五十定就令趙勝等具狀首告此時並無劉廉使名字為周來安出外本官自行根喚送官省臺委

官追問狀外逼問供指曾令周來安將鈔一百定過付本使收受未見虛實將劉廉使監收之後纔將周來安勘問勒指伊使本人不禁若楚符同強正將劉廉使抑勒招承追賊到官事未結正欵過原免延祐三年奉使宣撫巡歷淮東者老士庶並趙勝等列名陳辯及淮東宣慰使孫通奉等洞知情偽皆為辯白於今十有餘年尚未改正竊惟劉藻歿歷有年報効無愧凡平居之自守亦衆人之稔知不幸枉被賊誣名節掃地含冤無訴垂老可憐假使元賊果有即係奴證其主不惟有傷風化抑且違別詔條甚非朝廷美教化厚風俗之初意况兼元狀初無本官名字即係節次狀外展轉供指數目即此二端則是非判然矣如蒙憫其無辜特與照勘改正庶幾誣構得明而公論有在也

白劄

竊謂君親無將既載必誅之訓路馬不齒又昭有罰之文况惡逆亘古之罕聞宜臣子戴天之不共如元惡帖實等狗彘之所不伍梟獍之所不為富貴熏心自不勝其飽煖鬼神奪魄俾偶遂其凶邪雖養之極深曾寇讎之不若履霜失辯留虎自防致大行之暴崩實溥天之同憤傳諸道路蓋不思言不惟詩書歷代之未聞誠為國家百年之大變卑職等風聞未審心摧已深春秋之法人得而誅風紀之中責斯尤重豈敢顧影自階背義忘恩但以乘輿未來控懇無所欲論列而上達念通進之難期兼同惡方布滿要津恐無益而徒啟他釁是以含憤忍恥度日如年庶覲清光少摅積恨茲者欽遇 今上皇帝奮出宸斷張皇天威肆諸市朝大伸邦憲神人稱快億兆騰歡使綱常復明於今日乃社稷無疆之福然元惡帖實身為臺端殊為君偏其同惡之賊或寒微

致相或宿衛承家休戚既同安危攸寄今擢髮不足以數其罪齏粉不足以報我仇止戮其身未快人意擬合將各賊照依古法盡誅本族其妹難居宮壺仍壞室污宮以戒非常之變其餘但犯知情人等以次論罪卑職等為耳目之職任糾劾之司有所不知與知而不能得其詳及有所待而不即言皆合黜退

糾中丞等

人臣之惡莫大於無君春秋之譏尤嚴於與國故漢誅梁冀而其故吏賓客免黜者三百餘人朝廷為空誠以惡逆之人無罪可擬其惡人之徒雖有輕重不同而在所必論者也先王立法壞其室污其宮而瀦焉宮室何知必壞必污而後已以逆惡之所嘗居也居且若是而况官為臺察出其門下者乎元惡帖實其罪彌天今雖誅戮門下人數在百司且不可其在風憲如中丞某者自宣徽院與之周旋繼而援引入臺由侍御遞陞是職比者本賊為惡之後將本官呼召馳驛前赴上都蓋親聞其事矣本賊既為知院辛而出臺又於九月廿一日盛其鼎烹赴宅相賀惡逆如此忍猶媚之經歷某諂諛輕薄素非歷練阿附進用遂掌憲幕監察御史某某皆非風紀之才徒為本賊牙爪而已其為門下眾所共知具呈聞奏區處施行

遼王

嘗聞書曰惟辟作福惟辟作威言天子可以作此也朝廷仁厚相承匹夫但犯死罪有司再三詳讞必待奏可乃敢施行宗王同姓為國藩屏任之固重至於生殺之柄雖匹夫有罪亦不敢僭而况親族貴重出於匹夫萬萬者哉近按忒不花太子等嘗與惡逆此在 聖上躬斷者尚且會集宗親共議處置比者脫脫遼王擅



殺親族八里牙等實違 太祖皇帝大法不聞有所處置內  
外無不憂疑若不早正其罪則號令倒置威權下移祖宗法度有  
所不行啟將來之釁實闕宗社之大計者也卑職忝居言路義不  
容默

鎖南

嘗謂有功不賞有罪不誅雖唐虞不能治天下如奸臣帖木迭兒  
蒙蔽先朝專權政府包藏禍心離間宗室妄作威福誅害大臣使  
先帝孑然宮中以致賊臣帖實等乘釁為逆其子鎖南亦與其事  
兼本人陰險狡獪陷害臺諫附凶黨惡罪不容誅已經糾呈聞奏  
今奉命乃令杖決物議喧騰非示極刑曷伸邦憲乞賜早正其罪  
仍命辭臣聲逆賊等罪惡昭告天下以快元元之心天下幸甚

班丹等

嘗謂佞人不遠實妨日月之明早辨或虧必致冰霜之漸近者奸  
臣帖木迭兒之子班丹因收受李文郁等鈔定事覺奉旨追問徵  
贓到官僥倖遇免及刑部尚書不答失里微政院使哈散兒不花  
等俱經斷罷追奪寬宥逐得罪朝廷之人理宜屏棄况班丹之兄八  
里吉思之欺君弟鎖南之為逆俱已誅戮籍沒家貲觀音奴亦以  
贓杖一百七十一門之內父子兄弟險悞凶惡無所不為今班丹  
既以不教不答失里哈散兒不花等各曾經斷追奪流徙當杜門  
不出悔過思愆茲乃出入宮禁密近清光偃蹇軒昂醜然無愧  
聖天子即位之初親賢論道思致太平而此等奸凶豈宜在側其  
餘似此犯贓經斷之人即係一體宜從憲臺照勘聞奏屏黜實防  
微杜漸之一端也又班丹弟鎖住見任翰林學士同修國史朝廷  
實錄理宜嚴密其父子凶惡如此豈不載紀而令其弟在中親與

其事甚非所宜亦合明白奏聞廢黜及無令出入宮禁天下幸甚  
帖木迭兒門下等事

竊謂刑賞者人主之大柄有國盛衰之所係也故刑一人而天下服賞一人而天下勸者當其實也苟有功不賞有罪不誅滔滔橫流日復一日其禍有不可勝言者矣書曰惟辟作福惟辟作威此言天子之事也臣而盜弄所作雖當猶至於害家凶國况顛倒錯亂岸然橫恣者乎聖朝混一區宇以來言大奸邪必阿合馬桑哥之徒如帖木迭兒者兼諸人而過之今治化更新之日其人雖亡其流毒遺惡傷國體而妨新政者何限無以變之則其流害恐未易竟也至若平章王毅右丞高昉等備位台輔而以短少糧數倉官所職之事追奪所受宣勅尤公論之不愜者其門下同惡之人先因本官事發一一斥逐及其再入中書朦朧奏啟一一徵還濫

授驟升非其才而忝要職者有之各人含其私恩必不能盡忠於國昔梁冀既敗故吏賓客免黜者三百餘人朝廷為空蓋古今之共怒者也帖木迭兒之惡死有餘辜僥倖獲免雖是非邪正播告明白而天下之憤尚未少泄擬合剖棺戮屍將妻子家屬遷徙遠方以謝天下應被誅遣人數從者臺委官一一照勘有冤抑者即與昭雪沒亡者加以褒贈流竄者即與徵還黜罷者即與收錄所追王毅等宣勅即與給付門下之人在風紀者其不可用固不待言其散在大小庶司職役者合照節次糾彈姓名并延祐七年取回各人文案内數目及當時見在兩都就用續用各人員取勘見數明示黜降其太師監修國史僚佐通事譯史掾史宣史人等無非以賄得之擬不敘錄職官取充者止理舊資本府役過月日不與准算則天下之人皆知公論之有在天網之不漏是非邪正由

是益明而奸邪之徒亦知所懲戒矣

惡黨論罪

近為帖實惡逆狗彘之所不伍梟獍之所不為歷代之所未聞天地人鬼之所共怒止戮其身未快人意合依古法盡誅本族壞室汚宮遣逐其妹其餘但犯知情賊徒等第論罪已嘗論列除帖實之弟并子已行誅戮外其餘一切未蒙施行民心疑駭不滿所望竊謂國家有非常之變必以非常之法治之如帖實者身為臺端兼領數職妹為君配已正位次先帝待之情過骨肉其餘各賊皆累世富貴義同休戚而怯薛官員又腹心股肱之托其赤子帖木兒微賤匹夫位極宰輔子女玉帛房室田園不可勝數榮遇眷養無以復加縱不報効忍為寇讎自古宮闈之變未有若是之慘者興言及此痛心隕絕待以常法可乎且尋常殺人罪必處斬各賊所犯當何法以加之若苟且如此更無施行不惟神人歎望威刑失宜繼今以往何以為國區區臣庶之心亦知大臣必稟命 聖上而 聖上英斷必有以處之然而不可緩也為今

之計當一震威怒顯示大刑凡與帖實同謀之人皆合盡誅其族拆毀居室瀦為汚池其餘不係同謀而但犯知情隨從者等第論罪其家屬籍沒若留京師亦非所宜合竄放遠惡地面女子分配彼中流囚男子在彼居作永不放還帖實之妹係是禍根勿令汚染宮壺即日逐出從朝廷議擬區處應係各賊門下人員盡數照勘顯示黜斥如此則刑法適宜奸邪知畏神人稱快國祚永康矣聖上踐祚之初首宜以服人心安百姓為務此事既行則人心自服而百姓自安矣

至正集卷第七十六終

至正集卷第七十七

公移四

正始十事

竊謂春秋王即位大一統而謹始也蓋為政莫大於謹始未有不  
正其始而能善其終者也欽惟 今上皇帝以聖神之姿嗣大  
歷服凡在有生孰不忭躍思見一新之治夫繼政之間聖聖相承  
帖然無事猶必勵精更始思有以聳動天下之視聽况處大變之  
後者乎自非舉綱撮要因事制宜則必迂緩不切何補於治卑職  
忝當言路不敢煩瑣謹以十事切於新政者具列於後

一曰傳翼 太子蓋聞太子天下之大本擇人傳翼實有國之急  
先務也賈誼謂選天下之端士使與太子居處出入生而見正事  
聞正言行正道左右前後皆正人不能毋正又曰太子之善在於

早諭教夫心未濫而先諭教則化易成此古今不易之至論而治安長久之上策欽惟 今上皇帝春秋鼎盛萬年發軔之始天地 祖宗社稷之佑 太子金玉美質天性聰明泰山磐石之基也當此嗜慾未開心術未定之時首宜選擇正人端士以傳翼之教之以 祖宗寶訓并漢人文書使知創業之艱難治亂之成迹培養德業習與性成則本一正而天下定矣

二曰選擇長官蓋聞家之隆替在於主家之人官之廢興係乎長官之責如中書之總機務樞密之握軍政臺憲之司風紀為之長者可謂重矣當於蒙古人內選擇老成歷練敦厚公忠者用之苟得其人又宜久於其任責之以必成則天下之事庶乎有濟

世祖皇帝時為臺省官有終其身者故當時之治視古無愧其六部二品衙門行省行臺宣司為首官員俱合一體委任雖然此特

末耳請以其本言之國家每用大臣未嘗不難其人蓋以儲蓄培養之無素也深山之木必參天而後勝大厦之棟梁此豈一朝一夕之所致哉若急於用而以拱把之木為之不惟摧折不堪而傾覆被害者多矣培養之道無他在乎學校而已 世祖皇帝用許魯齋為國子先生當時蒙古生員教育成材者何限至於怯薛鷹房皆知所謂三綱五常今之學者不過粗識文字又復廢之使乳臭之子驟膺重任禮義廉恥視為何物惟欲保其富貴又安知君臣之義墮事隕身乃其宜也今後擬合令蒙古人員子孫弟姪必須入學培養教育使之有成而後量材授職他日必有出類拔萃之才出為國家之大用其至下者亦必知君臣之義此似迂而實切於事者也

三曰宮禁通籍蓋聞千金之子坐不垂堂萬乘之尊豈宜無備

故深居九重宮室宿衛嚴肅周密者蓋以豫備非常為祖宗社稷萬年計也周官小宰治宮禁之法而刑統闡入罪有等差我朝立國寬厚相承凡有朝賀雖臧獲之徒皆得直至廊廡縱觀行禮平居無事大臣奏對之時親隨吏卒皆得入內雖恢洪無外大示寬容而小人何知不可不謹其司門禁者惟視衣服之美惡而出入之朝士惡衣捶楚交下卒隸鮮服往來自如貴賤無分一至於此且禁之為言禁也禁人而使之不得至也今一切不禁而禁衛之設果何為哉擬合裁日令省部約會合干衙門參酌漢唐之制立通籍之法其於事體關係最重

四曰削去兼領軍職蓋聞總攬威權乃人主之事臣下責任豈宜使之有出位過分者故太平則注意宰相有事則責成將帥世祖皇帝立中書省以總機務立樞密院以治軍旅治民者不與

兵事治兵者不與民事其所以防閑之道截然有不可犯者邇來漸至紊亂如元惡帖實既為臺端又領軍衛雖包藏禍心固不易測而恃威藉權實由乎此常人之情手有鞭杖則思箠擊無是物則無是心也又如欲擊人者空拳赤體雖欲奮作人得以制一旦被之以鎧甲授之以兵杖則無所不至矣擬合照勘各衙門官員凡兼軍職領各衛者皆與削去以消奸宄於未萌且為無知小人之福

五曰太平武備蓋聞有文事者必有武備又曰有備無患夫天下之患莫大於無備山居有虎狼之患則高其垣墉富家有盜賊之患則堅其扃鑰而況為天下者乎備之道若治兵爾夫折衝禦侮使四海為一億兆晏然雖大奸雄不敢輕發者獨係乎此而已承平日久恃其無用卒日以惰將日以鈍將帥襲其父祖舊部例

皆膏梁乳臭之子聲色是務脫剝是習至有不能挽弓者士卒非老病則幼弱非影蔽則僱代器仗之顛倒不知所謂搏鬪擊刺之法其軍戶消乏與魯官不知存恤管軍官日復侵削困苦疲弊無以供軍需應屯戍者滔滔皆是也天下無事則已一旦或用則何以哉擬合令樞密院講究拯治教習之法先自五衛次及天下屯戍去處必使官知調度士知戰鬥不可因無鼠而養不捕之猫此太平之先務也

六曰逆賊妻妾蓋聞有非常之變必有非常之法治之比者元惡諸賊蒙朝廷恩寵雖海嶽不足以喻其高深而怯薛之設又腹心股肱倚托無疑者一旦如此赤其九族未足以雪天下忿怒之萬一欽惟 今上皇帝奮雷霆之斷盡殲梟獍襁褓之子殄滅無遺京師萬民鼓舞作躍但各賊妻妾尚未區處各賊存日同享富

貴其夫所犯蓋歷代之所未聞天地人鬼之所共怒不以非常之法治之譬猶被萬斤重物之擊而以寸莛報之擬合將同謀諸賊妻妾一體論罪或流竄遠方分配流囚其諸人索要為妻仍享富貴一旦又遇禍變視夫家如傳舍租稅誅戮恬然自安使綱常掃地痛宜禁止索者俱坐以罪庶幾刑罰輕重適宜

七曰頒詔以正前敕蓋聞令出惟行不惟反此常道也不得已而處天下之變必欲泥於古而蔽於常則亦不通之甚矣比者各賊惡逆傳聞四方震駭物聽既而詔告天下除殺祖父母父母妻妾殺夫不赦外其餘如謀反大逆奴婢殺主皆與釋免百姓聞之不得不為之疑也豈知各賊雄據兩都或握兵權或操省印或在憲臺布滿要地號令百姓乘輿遠在數千里外朝廷一有輕舉則居庸之闕不守矣當時危急之勢易於反掌雖惡逆授首在理可必

而兩都生靈先肝腦塗地矣 聖上沈機遠謀宸斷有待不欲輕發貽害百姓故以寬恩而釋其疑使惡逆之徒有以自安不至狂肆或生他變及神機之發誅殛元惡特煩一介之使爾此自古聖王之所不及也然而先行詔書已徧四方百姓不知將謂謀反大逆奴婢殺主皆可僥倖獲免擬合再詔天下使知元惡之授首以大慰衆心其有謀反大逆奴婢殺主者亦合復追入禁為萬世綱常之助

八曰帖木迭兒家產蓋聞刑賞者人主之大柄有國盛衰之所由也近籍沒帖木迭兒家產生前所授諸王各人等鈔物金銀不可勝數其為奸惡不待縷陳姑以刑賞大節論之其殺失列門也里失班當其罪者矜夸為功至於拜住朵兒只賀伯顏天下皆知其無罪盜弄威權致之必死監察御史瓊玉兒哈的迷失觀音保李

謙亨等成珪雖以言事忤旨而其子峻南適為治書觀音保又嘗發其劉司徒事是以父子表裏媒孽使四人竟坐誅竄則嫁怨於上又復陰黨逆賊帖實致 先帝暴崩皆帖木迭兒為之張本也近奉 聖旨免其抄籍 聖上勵精圖治之初刑賞大節尤當得宜擬合依舊斷沒其諸子家產先因事發獲免之後分張別居足見豫為三穴之計合依哈散諸子例一體籍沒仍將家屬遷發遠方以謝天下

九曰籍沒以補經費竊謂臣下奸邪既正誅戮閭閻疾苦首宜講求邇者巨貪宿惡以次誅鋤籍沒其家動以萬計是為蒙蔽奏請無補經費監察御史建言明立卷冊撥付省部以助經費果有特奉賞賜經由中書明白奏稟然後放支欽蒙允許近為帖木迭兒惡跡敗露籍沒其家本人之惡蓋不待言其家人之富又天下之



所共知者雲南吐蕃之殺奪中書宣政之括克賣官鬻獄濫賞冒支其目雖多無非腴剝生民膏血而致之者因是而行惠民之道是亦惠而不費者也聖朝富有四海豈待區區鹽價方得豐裕舊價每引添至

已極矣本人

要功言利再添一定致令其價翔湧百姓一日而不可無者坐令艱食鹽課因而恢辦不前又江南無地人戶科著包銀每戶額納二兩折至元鈔十貫雖曰驗各家物力品答均科解庫鋪席殷實之家固不為無而貧下小戶何可勝數所開鋪席本錢有不及一定半定者例以無田地有營運科約實為不堪至治三年之數欽蒙免徵而其額故在帖木迭兒及諸子并已籍沒失列門也里也班黑驢哈散小羅也里牙阿撒兒不花等家產又至大四年三月十八日至今應係賞賜臣下斷沒錢物田土房屋人口盡追還官

計其總數共有若干撥付省部收掌卻將帖木迭兒續添鹽課科包銀放罷不惟民力少蘇又且各處鹽課易辦昔梁冀敗收其財貨減天下稅租之半散其範圍以業窮民古今稱美今化瑟更張之時天下方拭目以待此其大者也

十曰樽節無益之費蓋聞去奢崇儉乃能化民節用愛人可以裕國朝廷之於財用蓋一日而不可闕者雖自古極治之世亦莫非取之於民但取之有道量入為出故國無匱乏民無疲困中統至元之初南供大軍之需北給防守之費方且廩有餘粟帑有餘財江南既平江淮之財用庫藏之蓄積暴露於外未聞一毫無功之賞一絲不當之費至大以來賞賜不貲造作不節與夫其餘一切蠹財之事不可枚舉而經費始有不足之患矣故累年以來每以銀糧不敷為患益求所以生財之道至於囊括繭絲不遺毫髮亦

復不足者何哉特用之不節爾民為邦本本固邦寧財用不節害必及民 聖上踐祚之始當近年多費之餘承其弊而革之詔告天下但凡係官工役造作停罷此蠹財之尤者而先去之得節用之大者矣天下生民不勝幸甚宜令中書省講究凡如造作之蠹財者皆明白條具逐項撙節依 四海家給人足此新政之最切者也 世祖皇帝用財之道則

辭治書兼侍書學士咨文

卑職學非出類才不兼人補報每慊於初心叨冒致過於素分中臺承乏已懼不勝禁藥執經益無所取惟揣度之自審故去取之輒陳編簡前言或許細微之掇拾冰霜要地難容迂懦之因循如蒙止供侍書之職庶免瘵曠之責

同王左丞請代咨文

嘗聞佐天子理陰陽中書實機務之本列庶位招俊又執政須才德之人非天下之所共推則公議恐未盡愜竊惟某等才疎學淺德薄望輕偶際明時誤承重任或叨承弼於兩府或冒參贊於歷年雖竭力致身冀涓埃之有報而鞭駑操鈍終致治之無裨比者災異洊臻黔黎告困究其責任首在漢人既莫亮於天子又久妨於賢路尚茲保錄豈止汗顏宜從都省聞奏選人替代放歸田里公道幸甚

樂府一

水調歌頭 題蕭獨清山水勝處

山水據全勝消得獨清人神仙定在何處此處可尋真山有蓬萊  
氣象水有瀛洲風物人是葛天氏說得紫芝老吟盡碧桃春 曰  
月花千日酒一溪雲回頭下望濁世無地不紅塵憶昔乘輅江右  
目斷丹霞翠壁底事走跋跋今日送君語聊為自移文

二 胭脂井次湯碧山教授韻

它山一卷石何意效時妝天生偶然斑駁蘭麝不能香梵作陳家  
宮井澆出後庭玉樹直使國俱亡故邑久留廢陳迹草茫茫 歎  
人間才璇室又阿房麗華鬢髮如鑑曾此笑相將一旦江山瓶墜  
猶欲夫妻同穴甚矣色成荒五色補天缺萬世仰媧皇

三 卽席贈河南廉使高辛甫

徒陽記同署三十四年過朝臺暮省蹤跡贏得鬢雙皤相別又逾  
一紀百歲都能幾見塵事日蹉跎今夕復何夕旌節照山阿笑  
年來洹水上試漁養迂疎久厭城市其奈故人何浩蕩雲山煙水  
寥落晨星霜木如子已無多邂逅一樽酒忍負醉時歌

四 和鄭彥章韻

春來久無雨都作艷陽天天公素念民事其忍穢良田鞭起九淵  
濃睡散作雨間膏澤生意發天然聽得老農語大有是今年玉  
堂深金闕近亂雲煙乾坤放眼無盡何物不鮮妍休把聖功收斂  
要使人心滿慰萬事此為先我老歸農好宜買潞河船

沁園春送鄉人高子翔次來韻

放眼蕪城北盡淮塹東馳海門歎故園遙隔關山歧路好懷深負

風月乾坤邂逅佳人笑談清致所見而今勝所聞江湖樂任提鷗  
挈鷺翳鳳騎麟世間富貴浮雲也莫校箕山與涓濱想抱關擊  
柝心期賢聖耕田鑿井上有華動休道官卑休嫌俸少且喜詩成  
句句新君歸矣問故園桃李幾度逢春

二 寄題詹事丞張布五緯亭用王繼學參議韻

俯仰乾坤做說義皇優游快哉看平湖秋碧淨隨天去亂峯煙翠  
飛入窗來鴻鵠翱翔雲霄寥廓斥鴳蓬蒿莫見猜門常閉怕等閑  
踏破滿院蒼苔人間暮省朝臺奈烏克堂堂挽不回愛小軒月  
落夢驚風竹空江歲晚詩到寒梅兩鬢清霜一襟豪氣舉世相知  
獨此杯京華客問九街何處堪避風埃

三 次希五韻時召至通州以病歸時齋詹事丞亦堅臥不出

因并呈之  
坎止流行行止非人何勞用心羨枝巢居士泥塗軒冕時齋老子

城市山林富貴何常榮枯逸轉惟有高名不陸沈他休問只清風  
一榻多少黃金 神仙方外難尋更可笑牛山淚滿襟且清尊素  
瑟半庭花影芒鞋竹杖十里松陰歸去成辭閑居留賦梁父安能  
抱膝吟迷途者聽雲間高唱誰嗣鴻音

四壽可行弟次其見壽韻

天相吾家篋笥無金詩書有人看發揮胃臆辭鋒凜凜薰陶氣質  
韋佩申申師友淵源賢才銜鑑胄館光華近帝宸男兒事便盡輸  
心力難報君親 讀書第一當勤只孝弟書中是大倫况人生為  
學百年在幼田家得計一歲惟春科占龍頭名高雁序好與皇家  
作鳳麟都休問是地鍾河嶽天應星辰

五壽同館虎賁百夫長鄧仁甫

十載英方同飲漢江同為轉蓬恨尋常會面當年無分三千餘里

此地相逢宇宙英奇幽并慷慨肯事區區筆硯中男兒志要長槍  
大劔談笑成功 棘門醉臥秋風看落日旌旗掩映紅愛朔雲邊  
雪一聲寒角平沙細草幾點飛鴻湖海情懷金蘭氣義莫惜瓊杯  
到手空君知否怕明朝回首渭北江東

六次班秀功韻

旅食京華蜀道天難邯鄲夢回笑白衣蒼狗悠悠無定黃塵赤日  
擾擾何為長鏡休彈瑤琴時鼓倦鳥誰教強去來衡門下幸良辰  
良友同酒同詩 功名少壯為期奈身外升沈自不知算人間難  
得還丹大藥山中儘有老樹清溪蕙帳雲空石田苔滿應被山靈  
怪去遲春來也向故園回首歸來休迷

七

弱冠離家浪走人間餘三十年奈救時才短虛塵政府讀書功少

深負經筵風月西清水霜柏署一歲中間漫幾遷君恩重便不教  
覆餗直許歸田 豐碑高表涇阡又飛上吳頭萬里船把家傳圖  
史拂除塵蠹舊裁松竹收貯雲煙大別嵯峨鵠逢縹緲盡在先生  
几案前閑人事但登樓小酌閉戶高眠

八

老子當年壯志凌雲巍科起家被塵囂沸耳塵成重聽簿書眯眼  
攻作昏花天上歸來山中絕倒部曲黃牛鼓吹蛙鬧官好判園丁  
牧豎一日三衙 平生幾度天涯恰驥任飄飄泛海槎向竹林苔  
徑時來教鶴山泉石鼎自為烹茶庭下花開樓頭雨霽儘着春風  
笑鬢華功名事問西山爽氣多少煙霞

九飛吟亭和白玉蟾韻

少日飛騰湖海奇習風雲壯圖把人間遠道看為咫尺眼前實地

認作虛無醞酒中天振衣千仞塵世煙霞有幾區君山下見洞庭  
清淺欲問麻姑 故吾只是今吾已深愧當年大丈夫悵川流不  
息直如逝者天風高舉更有誰歟鼎鼎何功江山多幸長欽歸來  
食有魚神仙事笑臨印道士還在洪都

十次張孟功韻

擊楫中流躍馬長途今非向年歎故人萬里江東渭北流光幾度  
雁後花前鬢影星星人情落落恰念蘇家負郭田空惆悵負清泉  
白石布幘行纏 壺中浩蕩瑤天問清濁何須較聖賢想塵埃狂  
走難逢一笑扶搖直上且任孤鶩飯有魚羹儲無甌石何必千金  
學計然君知否但東山醜婦也自嬋娟

十一次王仲武為壽韻

彼壽而康雁自能鳴榜還不材且光華老境春風秋月消磨舊夢

暮省朝臺倚伏相尋窮通素定軒冕於人果倘來神仙遠有桃花  
流水便到天台 雲林都是親栽幸登覽猶能矍鑠哉但攜琴載  
酒時時遊戲逢山見竹處處安排諫議無功催科無政爛醉何妨  
臥客懷承平日看英才用世多少臺萊

十二賦鶴奴次馬明初韻

頂有丹砂服具玄明云胡作奴想風霜搏擊不如一鶚雲霄變化  
復愧雙鳧爾雅無名山經不志多識慚予問學孤今知汝肯自為  
卑下甘事勤劬 蠅奴魚婢然乎笑多事文人善稽誣愛汝從仙  
侶每能謙抑日陪食飲惟取殘餘赤壁飛來雲龍放去守舍應門  
屬眇軀無多語似王家便了有約休渝

十三賦酪次明初韻

有物龐然乃北而犁山川舍諸為老饕營口因疎黃稚平心酬德

忍怠青芻方丈無功萬錢增害茹飲方將笑穴居桃林媪幸日輸  
甘漣香泛流酥 老饕笑問長鬚汝今似桐官不是奴更題封誰  
調聰明德祖和漿且浣消渴相如火候冲融春膏濃結常遣韋囊  
似瓠壺將軍腹問果誰相負吾欲明書

十四臨清舟中即席次韓伯高見贈韻

草木無情不問寒暄開時便開只黃花多事偏憐隱逸白頭何補  
願避賢才老友相逢清談絕倒休校劉郎去後栽尊中物勝它年  
千里漫寄寒梅 神仙合住蓬萊奈老母思兒忍不回任耿莊槐  
老休為癡夢梅家酒熟且浣愁懷渭北江東暮雲春樹何日扁舟  
更此來公知不便連朝觴詠能幾徘徊

木蘭花慢 秦淮次湯碧山教授韻

問東來何處控吳越壯江淮愛十里縈紆水雲圖畫鼓吹風雷回

頭下臨無地盡朱樓迢遞倚天開酒帘高懸別浦繡簾低拂長梳  
踈狂常與世情乖勝地却須來漫懷古長歌後庭花落斜日潮  
回傷心舊時明月照淒涼亡國恨無涯為問水邊鷗鷺人間幾夢  
庭槐

二

師至大戊申八月廿五日同疎仙萬戶游城南廉園甲京  
長短句予得清字皆即席成章喜甚榜之堂上疎仙其甥  
也後更號酸齋云

渺西風天地拂吟袖出重城正秋滿名園松枯石潤竹瘦霜清扁  
舟采菱歌斷但一泓寒碧畫橋平放眼奇觀臺上太行飛入簷楹  
主人聲利一毫輕愛客見高情便芟剝驪珠蓮分冰繭酒注金  
瓶風流故家文獻况登高能賦有諸甥清露堂上好月多應喜我  
留名

三次韻馬廷彥山居

羨山人結屋腰碧澗面丹崖問桂有餘香槐多擁翠誰種誰栽幾  
年力田勤學是慶源先世有人開樂地夏弦春誦浮雲暮省朝臺  
半生奔走負山齋何地不塵埃歎老病才歸鄉鄰幸恕不忍擠  
排白眉故人多事似東門偏更道賢哉但有黃雞白酒老夫不倦  
頻來

四次韻薛壽夫見寄

笑予生多癖非酒病即書因任世態翻騰亥訛成豕沈變為尤中  
條有亭無恙論三休吾更早宜休方外青山故在鏡中白髮新收  
天風鏘佩下瓊樓心事付東流向一壑雲深三年夢熟八表神  
遊淵明苦無多語只高標千古邈難儔老子新銜自署醉鄉談笑  
封侯

五和杜德常中秋韻



歎流光如水又分破一年秋奈妒雨癡雲良宵佳節不遂登樓山  
川滿前圖畫幸故鄉無復有新愁風物催成老境乾坤付與雙眸  
幾年京國苦淹留今得賦歸休况天柱峯頭清輝好在氛翳俱  
收身閑更逢全景是腰錢騎鶴上揚州明日霜天紅樹絕勝蘆葉  
汀洲

六 次白公巖為壽韻

記青年充賦曾射策對巖宸便暮者朝臺才離筦轄又掌絲綸狂  
愚豈勝時用幸扁舟歸去早知津一任無錢使鬼猶能有筆通神  
交遊萍水百年身襟袂幾回分正雪後花前江東渭北嗟我懷  
人澶淵名棠成誦肯推揚餘韻頌莊椿老矣甘心伏櫪天衢行看  
翔麟

七 和鄭彥章暮春即事韻

問東君何意來幾日便言歸悵衰病襟懷暄妍景物正欲相依狂  
風不知人苦遣萬紅千紫一時飛卻見楊花才思閑來紫綉晴暉  
可人應試紉羅衣底事雁書稀望故里關河雲林香靄煙水霏  
微多情已無聊賴更扁舟幸負鯁魚肥想見洹溪松竹綠陰籠滿  
苔磯

六州頭歌 次馬明初韻書所見

軒昂仙呂風度似吾儕凡鳥輩雖累百總輿臺敢借借何處風絲  
容昧平昔恣恣冥形迹異天壤隔遠相排 老眼渾如無見雲霄  
遠未便時乖笑蛛蝥肆螫自喪亦多哉我出塵埃浩無涯 有傍  
觀者同氣類公好惡挺身來行不義宜自斃坐虺類任奸回萬事  
如翻手吾方此外形骸 來汝鶴吾有語汝無哀誰遣乘軒烜赫  
令此輩眼不能開付恩讎一笑漫且啄莓苔休面三槐

二次明初為壽韻

避賢解組三見太行秋  
慙畫錦猶遠勝  
敝貂裘  
詭滄洲  
霜水清如玉  
窮霄壤  
忘物我  
恢障塞  
無牖戶  
底綢繆  
自笑平生事業知  
日頗善為謀  
有靜中至樂  
何處更天游  
已分淹留醉鄉侯  
有江湖客翰墨友  
凌元白  
壓曹劉  
論文暇  
陪杖履  
事旣籌  
共藏修  
世態誰能校  
輕翫  
骸重伊優  
吾有政  
鋤藥圃  
治瓜疇  
說與漁夫樵叟  
既相好  
豈但相  
猶任多言  
莫及野渡  
有孤舟  
天地沙鷗

蘭陵王

賦古劍用吉善甫韻

昆吾鐵神物  
千年不滅時  
出匣搖蕩碧空閃  
閃寒芒  
電光掣  
細看時是巨闕  
三尺斜明  
隙月新豐  
旅彈爾醉歌也  
勝毛錐  
校平側  
沈埋土花碧  
向堅石寒泉  
重礪霜雪  
一天星斗昏  
無色因起舞  
為樂鏗洞試倚  
魑魅膽寒  
石自裂  
免豐猷  
羈紲勲業  
幾英傑  
是曾戰

奸邪腥漬餘血  
方今四海邊塵絕  
佩服處  
閑伴金魚寶  
瑛只愁靈化雷雨  
暗水雲國

樂府三

摸魚子 鳳凰臺次湯碧山教授韻

自簫韶九成來後岐山猶是隆古羸顛劉蹶相枕藉幾度狸號鱗  
舞堪笑處又蕞爾鍾山一霎神光吐鶴汀鳧渚問吳德何徵紫霄  
輕下天意竟誰許 江山好老子狂吟箕踞千年考信無據多情  
只有秦淮月還照故宮焦土昏復曙漫寒暑悠悠老盡梧桐樹從  
今記取看阿閣成巢朝陽應瑞椽筆為君賦

二 中都錢荀平叔都事赴大都

正荒寒似逃空谷佳人又話離別風低白草天無際漠漠平沙如  
雪心如折看落日飛鴻一線明還滅長歌激烈把湖海襟期關山  
風物取次付彈鋏 毛錐子千古鑽研搜剗誰知更比鳩拙仲宣

不作登樓賦，閑殺一天秋色。珊佩瑛羨公去，鳴騶醉上長安陌。予懷轉結，怕紫塞寒深，碧雲暮合。酒醒見明月。

三 登洞庭湖連天樓和劉光遠韻

問樓頭幾多煙景，長風千里吹送。洞庭島嶼留殘雪，依約玉龍飛動。天故縱。要老子南來，添得詩囊重。遙山翠聳，更淡淡斜陽，蕭蕭落木。感慨古今，共人閒世，何處祥麟成鳳。繁華一枕春夢。江湖無限，閑風月待我往來吟弄。君莫痛看起舞紛紛，踏破中宵甕。深杯自捧，便喚起湘纍，汨羅江上沈醉，是奇供。

四 賦玉簪用明初韻

笑人閒珪袞何物，此華良貴。天與倚闌瘦立，亭亭玉刻畫，一生清苦。人有語道不出，蓋田豈是真才具。山人告汝，正蓬鬢蕭疎，不勝冠冕。真者亦投去。涇溪水洗盡眼中塵土。天葩靜看齊吐，冰壺

涼月天如水，塵柄肯論夷甫。翁醉舞任蕞爾，寰區共訝山中許。搔風沐雨，且受用清香，古今多少。富貴草頭露。

五 賦雜冠花用明初韻

笑山人木雞心事，年來斂。紫藏距幽花細草，聊娛目小圃更無閑土膏澤溥。豈天為司晨，偏與鍾奇古。無人起舞，對寂寂園池，瀟瀟風雨。竦立為誰怒。三生夢猶繞，尸鄉樓處，昂然幾欲掀舉。按丹蹙錦頭顱，好葉葉舊時毛羽。天已許，待海日升時，飛上桃都樹。人間凝伫，看叫白東方，卻來平地，千載不容腐。

六 次明初為壽韻

算驅馳三十餘歲，只將光景虛度。野雲本是無心物，辦得幾度霖雨。還自許量綿力，搆才猶可松筠主。天方見與把村落，溪山風煙朝夕著，在最佳處。青年志萬一容裨當，何慙與噲為伍。歸來

千仞岡頭看卻笑，甕天飛舞方學圃。要摘我園蔬，細和淵明句。饒  
說醉語道咫尺，重陽登高落帽休。競汨羅渡。

七次郭子敬祭酒同賞牡丹韻

記花王舊時名品，共傳姚魏黃紫。洛陽種植雄天下，何日移根來  
此青鏡裏。任淡抹濃妝，莫挽春山比。人間四美，更天遣舒郎等閑  
一賦千載，共心醉。清平調漫與東風料理，繁華能擾天紀。沈香  
亭上無人恨，流入錦江春水。安故里又何似。吾儕聊復尊壘耳。清  
歌且止，怕檀板無知多嬌，不耐驚得綵雲起。

八 涇堂盆池紅白蓮開予適卧病城居六月一日始往一觀  
落者雖多開者方未已喜而賦此

笑當年柏臺蘭省，四時風景。孤負歸來，幸得身無事。底又恩息朝  
暮。心語口是，傳癖詩癯，常把芳辰誤。夜來風雨，早練悅雲飄紅衣。  
霞捲香滴翠杯露。司花手無限，芳妍留住。凝妝為我，延伫姑仙

綽約如冰雪，次第相從微步。天不妒便，失卻東隅儘有桑榆路。人  
閒塵土看太華，峯頭花開十大。吾老尚能去。

九 明初賦摸魚子壽予既次其韻而可行塘成和之成什衰  
病技癢亦足為十首

買陂塘旋栽楊柳，歸來此是先務。它鄉故里都休校，舊雨不如今  
雨。鴻在渚，笑爾尚南飛。吾已安孤嶼。黃花解語，道人老宜秋，身安  
耐酒。此正有真趣。鑿坡路，大手深慙，自許超騰。又恃鍾呂，但求  
閑淡如元亮，卻恨詩多奇句。傾綠醕，底須按樂天。池上霓裳譜，休  
論往古。有三日重陽，約君同醉老子築西圃。

十

買陂塘旋栽楊柳，閑官宜治閑務。老天助我攻清淡，兩月不遭泥  
雨。規別渚，更累土為山。留土分為嶼。鄉人共語，歎百歲墮蕪，一朝  
疏闢。此去日成趣。江湖願自是平生心。許元英誰羨，陳呂石渠

細流鳴琴筑清似我家詩句杯引醅便收拾松風寫入絲桐譜區  
區學古愧竊祿無功投閑有分猶患不如園

十一

買陂塘旋栽楊柳年來於此承務涼臺煥館吾何有聊誌一時風  
雨洲映渚向一片煙波鼎峙嵯峨嶼盤空硬語挽三峽辭源千軍  
筆陣不盡樂閑趣 當年志為國微軀曾許青雲仍際觀呂從知  
弱步難勝重夢斷九天臚句時飲醅趁四序栽花綴作園池譜長  
歌弔古悵安得良田茫茫萬頃種玉闢玄圃

十二

買陂塘旋栽楊柳田園忙勝官務放魚種藕常無暇移竹又當新  
雨由近渚駕一葉扁舟時復還吾嶼花香鳥語况心上無營眼前  
多景經外有琴趣 尊壘小能費人間幾許荷香惟欠仙呂天光

雲影清難寫盡日樵髭無句池作醅要醉上通明傳取鈞天譜西  
山翠古任列壑爭譏攢峰竦詭難及野人圃

十三

買陂塘旋栽楊柳塵凡皆與停務半生醉夢人間世翻覆幾回雲  
雨歸有渚似真到三山縹緲紅雲嶼忘懷笑語任白鷺驚飛蒼苔  
不掃此去便無趣 斜川路宇宙茫茫何許綺園肯附諸呂悠然  
一見南山後便覺世多塵句持此醅論心事中間異姓還同譜迂  
疎好古因藝菊栽松滋蘭植蕙荒了種瓜圃

十四

買陂塘旋栽楊柳散人不理它務柳栽近水先應綠底用等閒霖  
雨遵北渚看雙檜盤空倒影搖煙嶼千言萬語只今日投簪經年  
閉戶便自得天趣 真男子報國誰如張許論交仍負嵇呂我今

但要閑陶寫幸免鏤章雕句村甕醕此真是交梨火棗傳家譜庭  
空樹古有野鶴時來衡門不鎖清徹地仙圃

十五

買陂塘旋栽楊柳歸農未免多務一庭四序饒風景且說夜來春  
雨香溼渚愛新樹依稀數影連三嶼黃鸝不語怕曲几團蒲坐忘  
方定驚破靜中趣功名事卻笑平生自許誰調陽律陰呂而今  
且向東君問舊句豈知新句開臘醕要醉喚石湖重緝寒梅譜榮  
枯自古趁九十韶華六旬餘力終日醉吾圃

十六

買陂塘旋栽楊柳清風靜掃塵務柳陰已見疎成密又聽綠荷敲  
雨鷗戲渚奈倏爾翻飛飛過崔巍嶼形神自語豈世事相縈機心  
未息物我不同趣池亭小收斂風煙來許漁歌何愧鍾呂水紋

瓦影相娛悅高詠退之佳句荷酌醕有一曲滄浪不犯人間譜悠  
悠振古問誰似吾儕攻迂習澹為水廢場圃

十七

買陂塘旋栽楊柳眼中已辨歸務柳成修幹蓮成實均沐老天恩  
雨憐小渚敢氣象侵陵海上神仙嶼神仙有語任涓滴蹠滂茫洋  
鯨浪各自適歸趣星星鬢鏡裏衰容如許西風又動商呂九原  
宋玉悲何及付與短歌長句飄汎醕縱不到箕山也是曾通譜由  
今視古看畫錦堂前霜天老月千載照韓圃

十八

買陂塘旋栽楊柳田家小小成務一年清景君須記大勝草煙花  
雨水沍渚把一片玻瓈圍護瓊瑤嶼鈎簾獨語是天富吾家地輸  
清供種種出奇趣桑榆樂造物而今已許一竿自惜歸呂圭塘

歎乃煙波曲卻屬腐儒章句尊有醕是波若神湯世與詩同譜誰能復古且池上觀梅爐中煨芋燈下治書圃

水龍吟 過黃河

濁波浩浩東傾今來古往無終極經天互地滔滔流出崑崙東北神浪狂飈奔騰觸裂轟雷沃日看中原形勝千年王氣雄壯勢隆今昔 鼓柁茫茫萬里棹歌聲響凝空碧壯遊汗漫山川綿邈飄飄吟跡我欲乘槎直窮銀漢問津深處入喚君平一笑誰誇漢客取支機石

二題賈氏白雲樓次牧庵韻

結樓高倚晴空人間何限思親處白雲誰遣等閑出岫悠悠來去本是無心宜知下土有人延伫悵荒煙衰草九原難作空目斷邱陵樹 見說大鵬變化趁扶搖又搏雲路朱簾畫棟闔山綿邈夢

魂良苦兩字行藏百年忠孝致君榮祖待更驅屏翳溥為霖雨繼商家傳

三 至順癸酉九月秋興亭賦

一亭飛出層霄昔人似為登高辦雙眸千里茫茫宇宙滔滔江漢一片秋光青山紅樹斷雲斜雁想人生塵世難逢開口但酬節何多歎 細數年年今日娛清歡半因羈宦邇來心事無慙猿鶴更齊鵬鷗華髮新添黃花任笑烏紗頻岸且一尊傾倒不須醉後把茱萸看

四 趙伯宣中丞代祀淮湖過維揚徵賦

五雲飛出蓬萊天香散滿人間世龍翔鳳翥千齡一遇明良慶會節鉞重來士民騰喜山川增氣相四方地遠九重心切都要見閭閻事 寤寐天顏咫尺裊秋風一鞭歸騎昔年勳業烏臺倚重紫



垣虛位自顧疎庸資身無策敢論經費但儒酸不改作醜充賦助和羹味

五 喜雨用鄭彥章韻

四郊禾稼如雲方驚數日甘霖小吾皇有德老天能事非因人禱  
一夜風雷元雲撩亂銀河傾倒問田間消息今年氣象更催得秋  
成早 壓盡東華塵土湛冰壺九重清曉晴光漸放瀛洲波定御  
溝聲小綠野春回黃扉畫靜篆煙縈繞願魚羹有飯避賢歸去向  
山林老

六 甲申七月廿六日偕王居仁王仲武小酌洹堂

洹堂半月三來小度日見添佳致蒼葭疎瘦黃葵高潔玉簪清麗  
林影波光新晴景物嫩涼天氣對溪山如此田園歸去除詩酒渾  
無事 爛漫鄉鄰難黍比當年鼎烹加味古今都說浮雲春夢功

名富貴何事迷途直臨老境纔尋平地把塵寰休問菊花行綻請  
重來醉

七 次前韻二首

此身就健宜閑莫教七十才休致招讒賈怨聲名烜赫文章雄麗  
三紀紅塵一簪華髮消磨豪氣有清泉白石實聞吾語吾衰矣毋  
多事 世故真如嚼蠟數年來已知無味尋常有句人為宰相閑  
方是貴洹水秋清無邊風月無窮天地看奮髯箕踞蒼苔濁酒為  
青山醉

八

半生人海風波謗書盈篋從文致歸來結構且圖跼伏敢求華震  
朝暮娛人水聲山色柳陰花氣笑彤闈紫闈浮沈十載更幾載成  
何事 好是西成咫尺秣田風已飄香味安排小甕從今不怕鄰

翁酒貴更築詩壇陪君游刃周旋餘地但有人來問金鑿舊話便昏昏醉

九遊三臺

幾年三到三臺往年不似今年好故人雲集遠山屏列藍蔚清曉趙舞燕歌一時奇絕百壺傾倒對山川如昔風煙不減但人比當時老放眼秋容無際碧澄澄雁天霜早曹瞞事業悠悠斜日茫茫衰草為問漳流古來豪傑浪淘多少有建安遺瓦張吾筆陣把姦雄掃

十者尚可夜讀手可始愈因自點檢目視雖不如昔書字稍大幸戲成此曲子之所慎疾也乃深寓節飲之意焉  
可翁點檢形骸關心六事今猶可摩挲老眼殘編細讀小窗危坐信手揮毫雲煙撩亂波濤掀簸笑蹒跚病足登山不武尚能踏苔

痕破便腹還堪容酒齒牙攻脯殺蔬果歌聲到耳宮商少誤肯教輕過饒口如門丁宜告戒卻須堅鎖怕麴生徒眾羣然趨入困風流我

十一己亥中秋用塔韻

一生白浪紅塵得歸才見乾坤闊三升無分如何料理文園消渴衰病禁持不教杖屨經邱尋壑記平生懷抱曾逢惡處都不似今年惡見說圭塘如舊賴山英好看猿鶴夢中斗室蠹殘圖史塵凝鐺杓蟾桂香多莫將長笛等閒吹落問嫦娥我輩何時還又享清平樂

十二壽靜公石平章

歷觀今古名臣求如公者人能幾平生勳業行其無事一誠而已方信名言臣門如市臣心如水政乾坤清晏飄然高蹈非明哲安

能此 太古歲寒松柏儘春風  
鬧開桃李傳嚴霖雨蘇門風月無  
非天理莫訝求閑從來老眼閱人多矣  
待他年鳳詔九重重下為  
蒼生起

綠頭鴨 八月十四日圭塘玩月

廣寒宮秋期明日方中歎陰晴自來無定  
何如今夕從容棹蘭舟  
亂穿波月斟玉筍清帶荷風身世難期  
歡娛易失名言千載記坡  
公公曾道涼天佳月何必限春冬况復  
有西賓共載仙季相從  
笑疎狂興來無盡艤舟更策吟筇任諸  
君班荆藉草環四岸度竹  
穿松飛上崇臺放開老眼冰輪誰遣卻  
朦朧多應是嫦娥見妒勝  
事不教窮天知我須臾風起萬里雲空

至正集卷第七十九終

至正集卷第八十

樂府三

念奴嬌 中都送韓岩夫歸大都

南鴻過盡正龍沙歲晚嚴凝時節朔吹翻空沙石走一夜坤維凍  
裂宇宙茫茫山川杳杳千里飛陰雪停驂回顧壯心未信如鐵  
京國十月先春杏桃無數破暖應開徹此去佳遊知不負醉裏雕  
鞍南陌篝火爐邊簡書叢裏肯念飄零客故人欲問此情正待君  
說

二 賦 螢

更闌人靜正滿天晴露半庭斜月時見飛螢三四點樹影依稀相  
隔暗地偷明微形自照冷焰明還滅有時分亂殘星流下天闕  
應念造物多情翻騰變化腐草還成物多少黃萎隨土壤爭似起

至正集卷第八十

樂府三

四十九

然飛越我正清貧寒窗寂寞賴爾成勳業按頭乾死也勝零落霜雪

賀新郎 登滕王閣用稼軒韻

陳迹空鳧渚悵繁華等閑一夢便成今古佩玉鳴鑿人如畫何處  
為雲為雨只明月還生春浦帝子當時無窮欲奈浮雲回首渾非  
故天有意肯輕許 江湖襟帶雄吳楚更翩翩三王文采驪章駢  
句一旦飛來韓家筆才見龍翔鳳舞漫千載懷人延伫豪傑紛紛  
今誰在笑世間華屋爭寒暑瀛海遠去無侶

二次呂叔泰南城懷古

故壘空如堵杳無蹤朝臺暮榭燕歌趙舞為問人間繁華夢幾度  
邯鄲炊黍只燕子春來秋去太液勾陳何由辨似咸陽一炬成焦  
土興與廢誰竟主 滿川芳草迷煙雨悵平生楚騷心事更堪羈

旅野水芙蓉香寂寞猶似當年怨女長嘯罷中天凝伫滄海桑田  
尋常事附冥鴻便欲飄飄舉回首後又千古

滿江紅 次湯碧山清溪

木落霜清水底見金陵城郭都莫問南朝興廢人生哀樂載酒時  
時尋伴侶倚闌處處皆樓閣對溪雲試放醉時狂渾如昨 沙洲  
外輕鷗落風帘下扁舟泊更寒波搖漾綠蓑青若為向九原江總  
道繁華何似今涼薄怕素衣京洛染緇塵從新濯

二次李沁州見寄韻

徙倚危闌愛四面嵐光翠濕回首見疎雲黃葉遠林平磧老眼都  
迷秋遠近壯遊已徧天南北有一官更比在家時添幽寂 人間  
世天涯客喚李杜招元白問鳧因誰損鶴因誰益有酒直須拚醉  
倒古今長短嗟何極笑韓非孤憤若為多常填臆

三同前

一夜繁霜便染得乾坤澄寂秋滿眼蕭蕭雲樹淒淒風日山色偏  
供羈旅恨年光肯為英雄息只寒花不減舊時香天應惜官况  
薄勞耕織詩律在森戈戟更山城容我清尊瑤瑟不是皇家勞結  
網姓名底用人間識喜使君時有一箋來雲煙濕

四和郭子敬夏日村居韻

一曲清溪收拾盡風聲月色還自笑六旬將近數椽方葺已分封  
侯非燕頤儘教有地爭蝸角算人生難得是清閑吾今得離離  
黍芑芑麥觀此景皆真樂更蔡花未謝藕花仍發繁劇只因詩有  
債迂疎却喜門無客問小亭盛暑不容人今秋月

石州慢次張凝道韻

足跡塵囂日厭紛華擾擾蜂蝶擊壺未了長歌又聽陽關三疊平

生湖海可憐牢落新豐蓬山回首煙霞隔鵬鷗不同天任焦明蚊  
睫愁絕停杯為問義娥幾度東生西滅俯仰金臺陳迹千年誰  
接天空秋老倚闌南北悠悠暮雲汀樹人長別想見苦吟時滿吳  
江楓葉

二送牛農師赴石州學正

少日襟期不信儒冠能把身誤長歌拂袖南來眼底雲霄平步黃  
金散盡三千流落京華區區又上并州路官冷坐無羶任蘆鹽朝  
暮今古男兒萬里封侯休歎雲萍羈旅我亦蒼黃明日攜書北  
去居庸關下蕭蕭風振駝鈴酒醒夢覺君何處畫山斷腸時滿斜  
陽煙樹

金菊對芙蓉宿程松壑月香亭次韻

曉夢初回餘醒未解月明猶挂疎桐在月香絕頂穩駕天風喬松

勁竹高寒地還容得幾朵芙蓉霜空放眼水痕褪碧山色添濃  
休問衰老詩窮把煙嵐奪取也是豪雄問今來古往誰異誰同老  
懷陶寫惟絲竹有捧觴林下丰容傍人任笑疎狂不減我輩情鍾

齊天樂 天津橋次韻

深宮傳粉江東主肥鮮養成嬌嫩輒北望中原自分秦越儘付馬  
蹂車碾神州天遠笑六代封疆一毫無展更著荒淫月明瓊樹照  
同輦長虹誰駕千尺要等閑盡跨人海深淺名襲東都侯封達  
命贏得興亡流轉年光冉冉又匹馬南來片時宮苑獨依闌干夕  
陽鴉萬點

滿庭芳

借答士安馬明初登荀和叔廣思樓

沙路無泥柳風如水嫩涼偏入吟鞍廣思樓上雨後看西山回首  
炎氛千丈便長嘯跳出塵寰青天外科陽淡淡倦鳥正飛還 郊

原秋色裏望窮霄壤倚徧闌干問神仙何處獨占高寒樓下悠悠  
洹水為底事不暫休閑吾衰矣休將舊手遮日上長安

二

槐院風清蘚階塵淨日長鎮掩衡門葛帷藤簟石枕竹夫人不作  
南柯癡夢要來往月窟天根花陰轉閒關幽鳥唬破一窗雲 起  
來盤膝坐松風沸鼎花雪浮春便洗除習次多少凝塵更喜秋原  
有秫快準備小甕清尊東籬下黃花香裏顛倒白綸巾

三 庚寅正月十六日夜獨酌戲成

學本迂疎才非明哲天恩偶聽歸田良辰美景相遇更欣然細數  
人生行止或城或市或在林泉都評過忘形適意惟是在尊前  
只今頭盡白但憐飲量不似當年甚藥痰媒渴無事招愆時有親  
朋來勸學康節微醉為賢先生笑偶當乘興又作飲中仙

玉燭新題李伯瞻一香圖次韻

清風林下寺愛三友聯編世無能四凌波仙子香魂散此地是誰  
招此萬紅千紫惟馨弟梅兄二子堪供領歲晚高寒來成花部新  
史佳人玉潔冰清縱髣髴肌膚異香難似醉吟無次花應笑彼  
此消融渣滓春空雁字不帶到江南情思還自笑今日相看袁家  
有姊

玉漏遲 同前次張夢臣韻

雪晴天似水風清月白蕭然三子天巧難名鏤玉鍛冰無泚卻是  
同心異種解斂聚山林高致誰不喜花中隱德人間真味 邂逅  
粲者相逢似瓊佩霓旌九霄飛墜移入銅瓶付與野人憑几滿意  
按香嚼藥有濁酒微吟相繼休喚起明日此觥重洗

望月婆羅門引 借王仁甫左丞賈伯堅左司朝罷過李廷秀  
參議因觀盆梅遂成歡酌廷秀求詞醉中賦此

紫宸朝罷東風吹到謫仙家貂裘抖擻塵沙一室宵明几淨人境  
獨清華有息齋名畫殿帥高茶 主人意佳道分手即天涯何事  
相逢不飲戚戚嗟嗟黃封旋折有鵝腊鷄胸與兔羝公不飲辜負  
梅花

二 雪夜宴沙班良輔家時為湖南宣慰使

人家十萬春風先到使君家天公更著芳華盡把樓臺粉澤瓊樹  
映橫斜要歌宜白雪暖借流霞 吳姬趙娃亂銀燭影交加不放  
行雲歸去敲碎紅牙可憐杜老肯飛送江頭只岸花爭似我夜醉  
長沙

江城子 次韻

懶於沙鳥拙於鳩為無求得無憂底事疎狂卻笑子長游畢竟無  
求何用出求不得亦宜休 西風真解釀羈愁試登樓望南州黃

葉疎雲搖蕩一川秋更被誰家多事笛吹不盡思悠悠

二 飲海子舟中班彦功招飲斜街以此答之

柳梢煙重滴春嬌傍天橋往蘭橈吹暖香雲何處一聲簫天上廣  
寒宮闕近金晃朗翠峯蹺誰家花外酒旗高故相招儘飄搖我  
政悠然雲水永今朝休道斜街風物好才去此便塵囂

行香子 同李元鎮晚酌張氏小閣

壁月香雲小院重門辨詩愁多是黃昏梨花淡淡柳絮紛紛對古  
銅爐神品畫靚妝人半醉多羞一笑欺春有丹青描寫惟真秋  
波側媚雲岫輕颺是藥珠仙巫峽女洛川神

鷓鴣天 次韻李沁州寄酒

滴困檀槽碎玉聲青州合換沁州名高風未論陶元亮豪氣應吞  
阮步兵明老眼懸浮生人間勢利一毫輕羈愁如海都消盡細

和清歌帶月傾

二 同前

甘滑端能壓蔗漿芳華初不借山薑可憐太白分餘漉遠與文園  
浣渴腸青鎖闥白雲鄉百年誰與較閒忙何如常對松岩老萬  
事悠悠付一觴

三

縷篆煙消月滿簾青綾香減夜寒天鵲橋誰駕銀河渡蚪漏應將  
海水添天漠漠恨厭厭不成怨夢睡空甜一春多少相思恨瘦  
得腰肢分外纖

四

伏臘歸宵已愴然天涯回首路三千倦游久賦王孫草寫恨應歌  
相府蓮天也老月空圓鐵心難受夜如年麝煤閑殺春風手想



像蟬蛾更可憐

南鄉子 醉書月香亭桂几

老子分漁樵說着登山氣便豪  
天外長江流不盡迢迢脚底青雲  
步漸高 兩手敢辭勞  
右有深杯左有螯我似淵明多一字陶  
明日黃花笑二毛

二 贈軋二弦胡琴高才甫

錦瑟思華年底用嘈嘈五十弦  
兩線清冰千萬調能傳句句分明  
字字圓 高藝擅華筵多少新聲出自然  
更著趙娘歌婉轉相聯  
消得詩人筆似椽

三

山水綠相紆好箇依山傍水居  
不是隆中高臥處茅廬直挽岷峨  
入壯圖 匡世策全疎只合歸來坐守株  
鄉里小兒從笑我非夫

卻勝攜人共泛湖

四

波漾石粼粼浮磬依稀類泗濱  
回首林慮千萬丈嶙峋不效修蛾  
一點顰 幽討日方親  
林下何常見一人便把清流都洗盡  
緇塵領取義皇以上春

五 次可行韻二首

薄宦苦營營半世長亭復短亭  
一旦結茅當疊嶂雲屏朝暮陰晴  
幾樣青 濁酒瓦盆盛  
農父無才卻有情好雨知時公到此  
安甯話到盆空月滿庭

六

小隱遠民塵草舍三間柳作椽  
圍繞佳城才二頃山田便覺胷中  
綽綽然 世態自爭妍  
老我壺觴業自專地濶天寬容醉舞  
回旋

又似偷閒學少年

七 和明初鶴飢韻四首

浙米斂頭炊枵腹雷鳴出險詩  
詩客眼高輕視鶴如雞終是雞羣  
有等威 供飼不如期奈此瓶  
儲告盡時也勝劈琴饒俗子充飢  
窮餓相從更怨誰

八

沙磔不堪炊華表高歌乞食詩  
不為啄腥甘趁逐羣雞為伴書癡  
老竇威 萬里在襟期會見青雲奮  
迅時吐故納新元有術偏飢  
奉瘞佳銘卻付誰

九

暑室困蒸炊呼鶴前來聽詠詩  
鶴告不餐空碌碌隨鷄諸僕無思  
但有威 雲海風相期忍使清齋  
十二時主者不才今遣汝調飢

騎去揚州定屬誰

十

塵夢黍方炊白鶴空中漫誦詩  
飲啄適時爭得似山雞敢效妖狐  
更假威 曾與老仙期衛國遭逢  
彼一時千六百年才不食無飢  
我欲推窮欠大誰

臨江仙

懷江萬梅方吐而予來長沙風雪十日晴復大霜有

十日惡風三尺雪繁霜又滿人間  
梅花誰與問平安玉肌清似削  
爭奈許多寒 夢繞琅璣江上路  
竹籬茅舍青山莫教芳酒滯歸  
鞍黃昏無限月待我倚闌干

踏莎行

贈相士

黃鶴樓前胭脂山上敲門有客來  
相訪自言閱遍世間人要觀塵  
俗酸寒狀 關塞冰霜江湖風浪  
歸來幸得身無恙君言雖應我

方慙山中道士何勞相

至正集卷第八十終

至正集卷第八十一

樂府四

鵲橋仙

同李雲松宣慰過思齋宣慰值出書其壁

雲松仙客箕山道士來訪思齋老子思齋何處未歸來想只在翠  
紅鄉裏風清月白橙黃蠟紫一卷笙歌紛起良宵不過負佳節  
都不念人生有幾

二 贈可行弟

花香滿院花陰滿地夜靜月明風細南坡一室小如舟都斂盡山  
林清致竹簾半捲柴門不閉好箇暮春天氣長安多少曉雞聲  
管不到江南春睡

三 贈相師周可山

春秋七袞江湖萬里老子閱人多矣兩朝名勝一囊詩道渾似當

至正集卷第八十一

樂府四

五十七

時表李 紅塵陌上白雲堆裏擾擾浮生行止我非燕頤虎頭人  
但詩聖酒狂而已

四 宴胡安常侍御家

清香華屋黃葵紅葉正是新涼時節文園多病不勝杯辜負殺一  
庭秋色 珍穀紛錯玉醅芳烈醉倒江湖狂客涼天佳月即中秋  
更有箇今年閏月

五

心閑勝貴身閑勝富已往而今始悟來言精力未宜閑此俗子便  
宜推去 秋風雜黍春山杖屨盡是幽人樂處儘教鬚鬢雪飄蕭  
總不礙銜杯咏句

蝶戀花

九陌千門新雨後細染濃薰滿日春如繡恰信東君神妙手一宵

綠偏官橋柳 樓下蘭舟樓上酒沙暖蘋香渾似來時候說與可  
人知信不傷春更比悲秋瘦

二 以變白方贈朱亮卿

聞道卿卿儂恁損花落深閨無限傷春恨天上靈方吾不靳為君  
細染三生鬢 鑷白從今閑玉笋坐着丰姿潦倒還髻亂洞裏桃  
花應錯認劉郎乃爾添風韻

三

一片白雲迷楚岫風捲青秧迤邐波紋皺馬上推敲詩未就回頭  
不覺雙山堠 漁父樵翁常邂逅問我何求無事空奔走我固蒼  
黃慚二毛少年有志還知否

四

萬象森森天漠漠吹徹殘更聲咽梅花角窗外月明無處著暗螢

沾露隨風落 夢裏詩成渾忘卻起傍屏山涼透紗幮薄靜中悠然心自樂蓬山不用乘黃鶴

五丁亥正月十三日親朋治具醉中賦此

老子行年過耳順蓬鬢蕭疎人道猶風韻領畧風光元有分賞心又喜燒燈近 薄雪初消寒欲盡詞館多閒時得陪英俊莫訝連朝為酒困東君已是傳花信

漁家傲 訪畢雪岳不過

木落寒林山骨瘦湘江風細波紋皺何處攜琴何處酒惆悵久亂鴉唳斷煙中柳 茅屋蕭蕭連甕牖半簷寒旭閑清晝歸路梅花香滿袖詩未就青山笑我空回首

二 歌圭塘四時四首

冰盡泉香雲飄渺韶華隱隱浮林杪酒在葫蘆魚在沼清晝情好

音時復來黃鳥 管領風光心未老衰顏卻怕清波照有酒可斟魚可釣能事了東風一曲漁家傲

三

窗影修篁搖翠葆牆陰幽徑連芳草蔞地雨來荷葉鬧香更好亂煙浮動紅雲島 稚柳千條絲嫋嫋柳邊宜著蘭舟小世態紛紛何足校收桂棹嗚嗚且和漁家傲

四

露洗璇穹青杳杳年光紅入灘頭蓼翠蓋撐煙吹半倒霜信早一箇寒影磨清曉 早是軒扉塵不到好山更與供登眺酒債漸多詩債少翻水調西風幾疊漁家傲

五

落日崇臺寒力峭登臨恰似尋安道有竹何人能徑造吾不諳相

逢要遂掀髯笑 雙檜凌空龍妖嬌有知定訝人枯槁珍重歲寒  
冰雪操君自寶老夫但和漁家傲

太常引 武昌別墅

胭脂山下老農家看雲樹翠交加香透小窗紗是昨夜幽蘭放花  
引泉澆樹破苔移菊更種故侯瓜一笑有生涯但休歎清霜鬢

華

二用同年歐陽原功韻贈相師陳壺秋

年來詩筆尚能神但無奈舊時貧天地一閑身且不在青雲後塵  
壺秋眸子野人心事相對好敷陳山酒正清醕要茅屋朝朝是

春

三速可行治具

小齋瀟灑頗宜貧清有竹靜無塵俗子不敲門只風月煙霞是鄰

古瓶清雅寒梅疎瘦昨雨忽紛紛尚有一枝春映報與南廳主

人

四同前

忍寒搜句意何如政因我腹焦枯茶竈火慵噓高陽侶原非姓盧  
佳章聯疊新醅寥落飛夢繞兵廚新釀取來無要親與梅花餞

途

五至正辛未春環樞堂海棠開偕馮公勵參議陪紫清夏真  
西人飲其下今年花發事務方殷欲尋舊盟跬步牽繫堂

一禱雨一過則紅衣落盡翠房森矗矣口占長短句奉紫清  
一笑

漱芳亭下小芳塘清散水芝香回首翠成房忍不待佳人奉觴

紫垣朝暮紅塵車騎遮斷白雲鄉老我重尋芳又渾似今年海棠

六次王居仁為壽韻

進為卿相退為仙歎今古少能全拋卻祖生鞭且占取煙霞洞天  
遙峯罨畫清流漱玉故里好山川黃菊正鮮妍便沽酒休論幾

千

七 登樓觀柳

雪消春氣恰和柔先到柳梢頭數日不登樓笑青眼窺人尚羞

清明近也老夫耄矣其忍負歡游飛絮便生愁儘都變浮萍去休

八 幹克莊杜德常寓所二松可愛醉中賦此以贈二君

二松如蓋偃中庭向朱夏作秋聲搖影動疎櫺掩映得苔痕轉青  
西清博士西臺御史相對又雙清咫尺到蓬瀛休認作藍田縣

丞

九 丙戌次舊韻寄紫清真人

道宮城市勝林塘松竹滿芰荷香煮酒出丹房記相見匆匆一觴

崇

雲萍飄忽仙凡懸絕翻手又殊鄉何日漱餘芳看華髮詩人許

十 再用舊韻寄紫清

詩成春草夢池塘相憶托玄香常記飲仙房笑一舉曾蒙十觴  
百年行止幾番離合吾老且吾鄉聊與領羣芳漸開到江頭野

崇

十一 圭塘四首

圭塘種藕已多時貼水曉星稀生意一朝回便萬柄紅酣綠欹  
連宵驟雨透空繁響清絕不容詩對境寫襟期要無愧鳴夷子

皮

十二

幽人早起赴池亭看初日照娉婷風蓋露珠傾又勝似前時雨聲

橫  
水沈香裏錦雲深處雙檜插天青一葉釣舟輕似野渡無人自

十三

四隄楊柳接松筠香破水芝新羅襪不生塵笑畫裏凌波未真  
紅雲飄渺清風蕭颯半醉岸烏巾不是葛天民也做得江湖散人

十四

雲舒霞捲萬妝濃倒影水天紅池轉小臺東又一種娟娟玉容  
仙肌綽約奇芳清遠浮動水晶宮一笑對衰翁好同赴廬山社中

清平樂

登北山閣

鍾山高處又結層樓住山自蒼蒼江自去萬景一時收聚平生  
湖海詩豪更傾五斗香醪不信人間好句不教驅入霜毫

二瓶梅

膽瓶溫水一握春如洗斗帳怯寒呼不起嬌滴粉雲香裏誰教  
淺笑輕顰恰如鏡裏傳神不用瑤天雪月眼前瓊樹常新

三避暑神山詠桂

堂前雙桂雲潑交加翠火老金柔花尚未且愛清陰滿地  
一旦花開天香吹散亭台卻被花神見笑先生未必能來

四和可行梅竹韻二首

平生愛竹到處縈心曲一日相違人便俗栽滿水邊茅屋誰知  
歲晚空山佳人能慰荒寒莫論和羹結實且看高節停鸞

五

賞梅觀竹不暇鏡黃獨白玉吹香連碧玉富殺山人林谷幾年  
行路艱難眼明今日重看便結歲寒心友休教夢到槐安

六



天寒日暮百繞梅花樹萬斛清香藏不住都在一花開處  
月墮霜飛不知疎影來時誰報雲川老子翠禽先在南枝  
可憐

七題郭思誠山居

西巖仙老身在蓬萊島竹月松雲塵不到况有清風自掃  
淺碧搖沙煙村落照明霞說與門前鷗鷺仙家又是漁家  
霜溪

憶秦娥 和希孟張中丞韻

山人笑人間不識山間妙山間妙嵐光浮動半江殘照  
待山英校煙霞曾結三生好三生好白雲深鎖葛洪丹竈  
移文莫

二

山瓢飲太空為幕雲為枕雲為枕松聲萬壑月明風冷  
老宜先省塵寰儘有清閑境清閑境孤雲野鶴杳無蹤影  
人生未

三

山花舞巖姿能笑禽能語禽能語百年心事一犁春雨  
短多官府老夫只解為農圃為農圃乾坤休問幾番今古  
神仙護

四

山鷄唱少年中夜心悲壯心悲壯世間何事不來眉上  
遠奚惆悵五湖煙水春搖蕩春搖蕩誰知平地拍天風浪  
迷途未

五送牛農師二首

春山碧詩成馬上應相憶應相憶盧溝橋畔晚雲如織  
別休多惜但悲後會知何日知何日暮雲心緒斷鴻消息  
人生有

六

長安陌東風楊柳花如雪花如雪青條無數為君攀折  
道輕離別臨歧未信心如鐵心如鐵舊懷新恨滿梁殘月  
少年剛

菩薩蠻 寄都下友人

憑高日望金臺路  
黃沙盡處空煙樹  
歲晚足蕭疎  
雁聲無夜無  
簿書臨俗態  
人道儒酸在  
何以慰相思  
半年無好詩

二宿造口用稼軒韻

月明江濶天如水  
夜深殘燭縱橫淚  
底事不求安  
世間多好山  
一杯君且住  
萬里人南去  
倡汝莫要予  
山寒無鷓鴣

三寄中書諸公

三司笑面鞞紋皺  
醜官憔悴非詩瘦  
紅袖寫烏絲  
誰曾夢見之  
淮鹽真是白  
染得鬚成雪  
何處有神仙  
能教白復元

浣溪沙

修黛橫愁苦  
愛顰頰霞亂玉  
更宜嗔嗅香  
按藥奈何春  
織就回  
文難會意  
寫成離字  
亦傷神  
他年不及卷中人

二護聖寺泛舟

花露濃沾桂棹香  
柳風輕拂葛衣涼  
放歌深入水雲鄉  
荷葉杯中傾綠醕  
瓜皮船上載紅妝  
都堂何似住溪堂

三游善應

崖上留題破紫煙  
巖前淪茗挹清泉  
爛游三日酒如川  
有水有山  
高士宅無風  
無雨小春天  
人間真見地行仙

點絳脣 病中偶成

酒病詩愁好  
春三月常辜負  
開門春暮新  
綠迷雲樹  
一片飛花  
綰住游絲舞  
東風妒等閒  
吹去散亂隨紅雨

二次呂叔泰韻

雲海茫茫何人尋  
得春歸處  
年年遲暮不逐春歸去  
何日真歸  
歷歷江湖路  
舟橫渡青山  
無數醉吸荷心露

如夢令

牆角黃葵都謝開到玉簪花也老子恰知秋風露一庭清夜瀟灑瀟灑高臥碧紗窗下

二

為問蕃釐道士今日瓊花開未老子偶然閒要向花間遊戲遊戲游戲莫待清陰滿地

三 饒德明學士收疎齋詠竹二首求和

誰把清風領受尋得歲寒心友霜月玉亭亭恰似老夫詩瘦詩瘦詩瘦無奈碧雲懷舊

四

歲暮天寒時節滿意相看冰雪不遺野人歸誰慰此君清絕清絕清絕添上一方明月

五

桃李東風不耐妙在西山如儻策馬看山來政亦青青相待無奈無奈卻被暮雲妨礙

六

一片蒼苔鑿破百折清泉分過長日午陰圓自挈胡牀來坐斯可斯可從此閑身屬我

七

昨夜庭梧墮翠詩思尤便爽氣無事要生悲可笑宋家多事衰矣衰矣但校鄰翁酒味

八

火榻只疑春早紙帳不知天曉枕上問山童門外雪深多少休掃休掃收拾老夫茶竈

九 次郭子敬韻四首

三日瓊瑤飛灑天巧豈容摹寫佳客不曾來有酒定從誰把文雅  
文雅應笑珉多玉寡

十

老子風神清灑好句自然傳寫立雪賦梅花更折綠條成把閒雅  
閒雅莫道吉人辭寡

十一

門外雪花飄灑坐上烏絲方寫秋露白泠泠更著玉人親把三雅  
三雅取醉莫論多寡

十二

有淚綠窗偷灑有眼錦箋難寫消愁不勝春玉骨都無一把風雅  
風雅正值文君新寡

長相思

夢揚州到揚州明月長街十二樓珠簾不上鉤 為誰憂為誰愁  
愁得春風人白頭見花應自羞

書許文忠公至正集後

大元我湯翰林學士承旨集賢大學士光祿大夫兼太子左  
諭德中書左丞參知政事知經筵事賜推誠守正昭德佐理  
功臣銀青榮祿大夫中書平章政事上柱國追封魯國公謚文忠  
許有壬先生手著至正集百卷同年歐陽原功敘之謂雄渾  
闕雋不可以淺見窺非虛語也憶公鴻才博學以進士第歷  
登顯仕雖當奸雄薰灼之朝猶必慷慨直陳力持國憲蓋其  
治蹟彪炳史冊實乎尚矣是集彙於門人而陵谷變遷令嗣  
楨起遣南徙迺弟有孚度必逸亡而又迫於當時知文之士  
爰於是集中記憶偶存者彙為圭塘小藁一十六卷嗚呼是  
集之不見於世雖太常公亦痛惜之余以湯邑文獻至重手  
錄小藁成訂識數言於後而深以不見是集為憾幸於辛卯

秋初得之賀聯芳先生乃公之後裔現居程岡者所藏之原本而聯芳先生沐手而敬錄之也余不禁躍然興曰是余之志也夫是余之志也夫回憶太常公所痛惜者竟復何如毋亦天未喪斯文之意乎余伏而讀之竊見吳田以勸務本迷樓閣馳以戒荒淫風憲正始以除積弊而維國脈至於滿江病酒見胥如鬼之句又若逆計數百世之後痛下針砭異代同揆也余方有事抄錄適以仲秋先父見背輟筆者數月延至癸巳季秋始得卒業嗚呼是集之復見於世其亦天未喪斯文之意乎至於漫錄漫總二書所關非輕余尤冀其復出如是集之比方今

聖天子教化休明  
特開四庫館徵求天下文獻大臣有司謹以是集獻之

闕廷登史冊而光

國家知我湯人文於今未艾也豈不盛哉

昔

乾隆三十八年歲次癸巳孟冬之中浣邑後學楊丙秋浦謹識

附錄

圭塘小藁序

昔人論文章貴有館閣之氣所謂館閣非必揆藻於青瑣石渠之上揮翰於高文大冊之間在於爾雅深厚金潭玉潤儼若聲色之不動而薰然以和油然以長視夫滯澁恠僻枯寒褊迫至於刻畫而細放逸而豪以為能事者徑庭殊矣故識者往往以是槩觀其人之所到有足徵焉本朝自至元大德以訖於今諸公輩出文體一變掃除儷偶迂腐之語不復置舌端作者非簡古不措筆學者非簡古不取法讀者非簡古不屬目此其風聲氣習豈特起前代之衰而國紀世教維持悠久以化成天下者實有係乎此也集賢大學士兼太子左諭德安陽許公自進士高等接武而上歷侍從膺藩宣典內制佐政府出入中外四十有餘年其牢籠萬象漱滌

芳潤總攬山川之勝與夫推之經濟當世者何莫非學其所取數  
多其用物弘故其所發筆力有莫窺其倪而邈迤曲折且不它蹈  
則夫冠冕佩玉之氣象信得而徵之矣公大全集凡若干卷簡而  
出之為詩文樂府若干公題曰圭塘小藁圭塘安陽別業也公之  
所休逸也花竹泉石超然林壑故以命編云契生翰林學士承旨  
榮祿大夫知制誥兼修國史張翥書

中書參知政事許公文過集序

歐陽元

本朝儒者參預大政而以詩鳴者吾得三人焉其一金進士其仕  
當南北混一之交其風猶有金源之風其一齊魯世家子所與居  
游又多京國華腴其詩自有富貴之氣及南渡江漢詩乃清厲其  
一家本梁趙流寓荆楚筮仕并營其詩蓋負豪爽之資每北渡居  
庸詩益奇雋蓋安陽公也三參預皆有治才詩其餘事而以鳴者  
人多其有餘力也至元三年之夏安陽公扈從上京賦詩百二十  
餘首名曰文過集向余所謂奇雋者殆山川之助歟公才力縱橫  
無少凝滯氣機出入雜以譏評用之於政於文皆然獨是集題曰  
文過余未然之明良賡歌昉於皋陶聲律依永教於后夔世稱相  
業莫先皋夔曾是以過乎公屬余識之題而歸其集

圭塘小藁序

圭塘小藁者即至正集而不具錄者也圭塘者先生別墅也先生  
幼穎悟先公自教之趨庭應對詩文立成嘗侍游見古碑命往讀  
輒背誦以復同行驚歎謂偶然故試之始信甫冠入京名譽日起  
未幾擢高科登顯仕著述不廢精敏絕人門生彙為至正集歐內  
翰謂雄渾閎雋不可以淺見闕有亨仕南臺見江湘間得片文隻  
字十襲傳玩至有假託以銜者遐方好事不憚請求然卷帙浩瀚



諸生應酬不給有孚得先生所輯名圭塘小藁即至正集而不具錄者繕寫以應之其居禁近省臺論天下事凡見章疏嘉言讜論具至正集方貴顯時何求不獲而獨留意於文翰今年七十四杜門却掃聖上念老臣優全祿任子官俾得安閑至於親朋懇求亦有不免孔子曰不知老之將至云爾其識趣為何如昔子由序東坡和陶詩曰轍少而無師子瞻既冠學成先君命轍師焉夷考其後宦遊四方中被誣斥睽離之時多從兄之日少如有孚者不敢竊比前賢然亦承命而師三十不去左右開發成就固已不少而憤憤庸庸學不加進年將耳順踰伏祠官步武且不敢仰視而況文章道德之懿哉他日將何以見先公於地下日月逝矣雖悔可追託名集端因以志愧至正庚子中秋弟中憲大夫同僉太常禮儀院事有孚序

